

7488.
7489

Բալեգրաբ

Ամսնց

91(47.925)
P-14

ԲԻԺԻԿ
1904

91(ԳԴ. 925)

Զ - 14

Ա. ՔԱՂԱՆԹԱՐ

Ա Ա Ս Ո Ւ Ն

ԱՅԽԱՀԵԳԻՐԱԿԵՆ ԳԵՐՏԵԳՈՎ

ԵՐՐՈՐԴ ՄԱՂԱԳՐՈՒԹԻՒՆ.

2004

ԹԻՖԼԻՍ

Տպարան „ՀԵՐՄՈՒՍ“ Մադարեան փողոց № 15
1904

(41)

ԲՈՎԱՆԴԱԿՈՒԹԻՒՆ

Աշխարհագրական գիրքը և տնտեսական գիրքը

I. Երկրի գիրքը: Լեռները.—Անդօք, Կորդոք, Ծովասար, Մարաթուք սարերը:—Գաւառակներ՝ Շատախ, Դալորիկ, Դիանը, Դուլի, Խութ, Գլուղերը:

II. Ժողովրդի առանձնայատկութիւնները:—Սասունցու քաջութիւնը:—Սրբատեղերը և աւերակները:—Հազուստը, լաքան կօշիկը, աները:—Քիւրդերը և նրանց յարաբերութիւնները հայերի հետ:

III. Բնութեան տուրքերը և հարստութիւնները: Մանանայ.—Անտառները, —Դահուկներ:—Լեռնային բուսականութիւն: Կաղ և նրա զործածութիւնը:—Ընկուզենիներ:—Հանքեր.—Հողը, նրա որակութիւնը և քանակութիւնը: Արհեստական արտեր և այզիներ:—Հողի պարարտացնելը:

IV. Հողագործութիւնը, —Հացահատիկներ՝ ցորեն, գլգել, սորեկ և այլն:—Խւզ մատակարարող նիւթեր՝ կտաւատ, պղինչը և մրկիթ, —Բամբակ և առույտ, —Մրգեր: Անասնապահութիւն՝ կով, ոչխար և այծ, —Կաթնատնտեսութիւն:—Շերամատահութիւն:—Մեղուաբուծութիւն:

V. Ընդհանուր ակնարկ Սասունի վրա, —Սասունը հին ժամանակներում:—Վարչական և տնտեսական, արտաքին և ներքին փոփոխութիւններ:—Սասունցիների ծանր և վրդովված դրութիւնը աղետից առաջ:—Վերջաբան:

Дозволено Цензурою, Тифлисъ, 27-го Августа 1904 г.

5 6647 - ահ



2129-70

8

I

Երկրի դիրքի:—Լեռները, Անդոֆ, Կօրդուք, Ծավասար, Մարտուք ասրերի:—Գաւառակներ Նատախ, Գալորիկ, Դիսմբ, Ղուլի, Խուք:—Գիւղերը:

Հեռնային այն երկիրը, որ կոչվում է Սառուն, ուր տեղի ունեցան 1894 թուին, ամառը, տիսուր անցքեր, աւերումներ և կոտորածներ, գտնվում է Բիթլիսի նահանգում, Վանի լճից դէպի արևմուտք և հարաւարևմուտք, Մուշ քաղաքից դէպի հարաւ:

Սասունը՝ լեռների, ժայռերի, խութերի, անընթիւ ձորերի, կիրճերի, քարանձաւների մի կուտակում է, ուր տեղ-տեղ բացվում են փոքրիկ հարթութիւններ երկրագործութեան համար, սարաւանդներ՝ անասունների հօտերը արածացնելու համար:

Այգտեղ ժողովուրդը դժուարութեամբ է հայթայթում իր ապլուտաց: Դարերի ընթացքում կպած, բևեռված լինելով հայրենի երկրին, նախել է բնութիւնից բոլոր այն խորշերը, ուր կարող էր նա սերմ զցել հաց ստանալու համար և ծառեր տնկել պատուղներ արդիւնաբերելու համար: Շատ տեղ նա արհեստական արտեր է շինել, քար ու կրող ամրացնելով նրանց եղերքները

և պատնէշներ կանգնեցնելով հեղեղների կործանիչը ոյժը կոտրելու համար:

Խոր ուսումնասիրութեան արժանի է Սասունի ժողովրդի տնտեսական և առանին կեանքը: Նա պարունակում է իր մէջ շատ բնորոշ, հետաքրքրական կողմեր, որոնք լոյս են սփռում թէ Սասունի և թէ նոյն պայմաններում ապրող ժողովուրդների կենցազավարութեան առանձնայատկութիւնների վրա:

Ներկայ գրուածքով մենք կամենում ենք ուսումնասիրութեան մի սկզբնական փորձ արած լինել: Մենք ժողովեցինք մեր տեղեկութիւնները այն սասունցի պանդուխտներից, որոնք սոսկալի կոտորածից յետոյ, թափառելով զանազան տեղեր, հասել էին և Անդրկովկաս: Նրանց միջոցով և քարտէլների օգնութեամբ կազմեցինք և այն աշխատը հագրական ուրուագիծը որ կցում ենք մեք աշխատութեան:

Սասունցիները իրանց երկիրը անուանում են Գաւառ: Հին Սասունը գտնվում է այդ գաւառի ծայրում և մի փոքրիկ գիւղ է, որի բնակիչները ներկայումս քիւրդեր են:

Սասունի լեռների ամենամեծ բարձրութիւնը Անդօք սարն է: Վերջին կոտորածների ժամանակ Անդօք սարը վերջնական ապաստանատեղն էր թիւրք զօրքերով և քիւրդ հրոսակներով պաշտպան հայ գիւղականների համար:

Անդօք սարը գտնվում է մի լեռնաշղթայի վրա, որ ձգվում է դէպի արևմուտք և հարաւարեմուտք: Այդ լեռնաշղթայի վրա բարձրանում

են նախ Քեփի սարը, յետոյ Արքնաղը իւր, Կանիէղարսէ, (կոչվում է նոյնպէս Հեղինի սար) բարձրութիւնները:

Եթէ բարձրանանք Անդօք սարի գագաթը և նայենք բրջակայքին, մեր առաջ կը ներկայանայ հետեւելը:

Հիւսիսում անցնում է մի լեռնաշղթայ, արևմուտքից դէպի արևելք ուղղութեամբ, որ կոչվում է Կօրդուք: Այդ շղթան բաժանում է Մուշի երկիրը Սասունի լեռնագաւառից: Հարաւում կոտավկած են Դալորիկի սարերը, որոնցից նըշանաւորներն են՝ Մերգիր և Սպիտակ սարերը: Հիւսիս-արևելքի հօրիզոնում մթնանում են Խութի լեռները: Արևելքում և դէպի հարաւ-արևելք գետեղված է Ծովասարը իր լայնանիստ լանջերով: Հեռու հարաւ արևելքում երեսում է սրբազնն Մարաթուքը:

Լեռնային այս բոլոր երկիրը բաժանված է փոքրիկ գաւառակների: Անդօքը իր հիւսիսային ստորոտներով գտնվում է Շատախի մէջ, որ շարունակվում է դէպի արևելք և հարաւ-արևելք: Դալորիկի լեռներում գետեղված գիւղերը մտնում են Դալու քիւկ գաւառակի բրջանը: Դալորիկից դէպի արևմուտք ձգվում է Ղիանք կամ Խիանքը, որի հիւսիս-արևմուտքից սկսվում է Ղուլփ կամ Խուլփի կոչված գաւառակը:

Շատախի վերին մասում, Անդօքից դէպի հիւսիս, գտնվում են Գելիեգուղան, Ալիան, Շենըկ, Սեմալ, Գելիեգենման գիւղերը, որոնք վերջին աղէտաների ժամանակ կազմում էին

հայերի և քիւրդերի ու թիւրքերի լնդհարման կենտրօնը:

Այդ գիւղերից ամենանշանաւորը և ամենամեծն է Գելիեգուղան գիւղը, որ ունի 200-ից աւելի տներ: Գիւղը գտնվում է ձորում և գետակով բաժանված է երկու մասի: Գետակը, որ կոչվում է Անգօքա-ջուր կամ Կանիեքաջի, բղխում է Անգօք սարի խորշերից և մտնելով մի խոր ձոր՝ անցնում է նաև Գելիեղուղանի միջով, յետոյ թեքվելով գէպի արևելք և հարաւ՝ գնում է թիւրդերի երկիր: Շենըկ ու Սեմալ գիւղերի մոտով էլ անցնում են գետակներ, բայց համեմատարար փոքր: Սակայն ջուրը այնքան առատ է, որ կարողանում են ջրաղացներ բանել: Գելիեղուղանը ունի եօթը ջրաղաց, Շենըկ և Սեմալը երկու երկու ջրաղաց:

Գելիեղուղան գիւղը շատ յարմար գիրք ունի պաշտպանվելու համար: Զորի եղերքները, որի խորութեան մէջ ընկած է գիւղը, բարձր են և կարողութիւն են տալիս յետ մղելու յարձակվողներին, թափելու նրանց վրա գնդակների մի ամբողջ կարկուտ և մինենին ժամանակ ազատ մնալու թշնամիների հարուածներից: Մինչդեռ Շենըկ և Սեմալ գիւղերը յարմար գիրք չունեն պաշտպանվելու համար: Այդ է պատճառը, որ երբ սկսվեց Շենըկ և Սեմալ գիւղերի շրջանում 1894 թուրք ընդհարումը, այդ գիւղերի բնակիչները շտապեցին Գելիեղուղան և այդտեղ կարողացան մաքառել կատաղի հրոսակային արշաւանքի գէմ ամբողջ երեք շաբաթ:

Շենըկ և Սեմալ գիւղերից սկսվեց քիւրդերի հետ առաջին մասնաւոր ընդհարումը, որ յետոյ իրեւ մի կայձ՝ հրդեւեց շրջակայքը, անցնելով Գելիեղուղան և Աղբիկ գիւղերով գէպի Դալուրիկի և մասսամբ Ղիմնքի գիւղերը: Շենըկ և Սեմալ գիւղերը յայտնի են իրանց խաշնարածութեամբ: Այդ գիւղերը գտնվում են այն ճանաւապահի վրա, որով գելիեղուղանցիները գնում են Մուշ:

Շենըկ գիւղի հողի սահմանում գտնվում է մի խոտաւէտ ընդարձակ մարզագետին, որ կոչվում է Մըկեմուղան: Այդ մարզագետնումն էր վրան զարկել թիւրքական զինւորների այն վաշտը, որ 1894 թուրքարքնանից նախօրօք ուղարկված էր ապագայ աղէտի տեղը և հետամուտ էր լինում այն բոլոր գործողութիւններին, որոնք տեղի էին ունենում Սասունի լեռներում: Այդ վաշտն էր, որ զբաղված էր քիւրդերին զինելով քրիստոնեայ տարրի գէմ կուելու համար:

Եթէ Շենըկից և Սեմալից գնանք գէպի Շատախի ստորին գիւղերը, ճանապարհի վրա և նըրանից դուրս՝ կը հանդիպենք Անթանիա, Քօփ, Քեղաշէն գիւղերին: Քօփի կողմից գալիս է մի փոքրիկ ջուր և խառնվում Անգօքա-ջրի հետ:

Շատախի բնակիչները հայեր են:

Շատախից գէպի արևելք և հիւսիս-արևելք ձգվում է Խութ գաւառակը, որի բնակիչները նոյնպէս մեծ մասամբ հայեր են: Խութի շրջանում կան և լայնատարած սարահարթեր, օրինակ և Աղբիկից վերև: Ինքը և Աղբիկը նշանաւոր

սրբութիւն է ճանաչված շրջակայ գիւղերի համար, որոնք ուխտագնացութիւն են անում գէպի այնուեղ:

Այն խոր ձորը, որի միջով անցնում է Անդոքաջուր գետակը, թողնելով Գելիսկուղան գիւղը, անցնում է Դալորիկի միջով և յայտնի է ժողովրդի մէջ Դալորիկի ձոր անունով: Այդ ձորը բաժանում է Դալորիկի գիւղերի մեծ մասը դրսի աշխարհից և ընդհարումների միջոցին պաշտպանում է երկիրը թշնամիների յարձակումներից չնորդիւ իր սուր և ուղղահայեաց եզերքների, որոնք իրանց ժայռոտ կողերով անկարելի են դարձնում մարդկանց և անսառւնների երթևեկութիւնը մէկ մասից գէպի միւսը:

Այդ ձորի մէջ յայտնի է Սատանի կամուրջ անուանված տեղը, որ գտնվում է մերձաւրապէս Եղարթ գիւղի զծի ուղղութեամբ և որ լինելով հաղորդակցութեան տեղ, կարող է միենոյն ժամանակ թշնամիներին չարաշար ծեծելու մի կէտ նկատվել: Եւ լեռնական ժողովուրդը յաճախ օգտվել է անցեալում այդ գիւղից՝ կամուրջի վրա չքացնելու օտարների ցանկութիւնը—մտնել Դալորիկի երկիրը:

Զորից գէպի ձախ ձգող տարածութեան վրա քիչ գիւղեր կան, օրինակ, Հեթինք, Աղբիկ կամ Աղբինք և մի երկու ուրիշ բնակութիւններ: Գիւղերի մեծ մասը գետեղված է այն լեռնային տարածութեան վրա, որ գտնվում է ձորից գէպի աջ: Այդ գիւղերից նշանաւորներն են՝ Դալորիկի, Հօռդինք, Աղղանք, Հօնուտ, Հարթք, Հաքմաք: Կան

և փոքրիկ գիւղեր, ինչպէս Փորխ և Դվալին:

Դալորիկը Մերգիր և Սպիտակ սարերով բաժանված է Դիմանքի գիւղերից: Դիմանքի մէջ յայտնի է Իշխնձոր գիւղը, որ առաջին կոտորածի ժամանակ մեծ մասնակցութիւն ունեցաւ: Նա բազմամարդ գիւղ է, մօտ 80 տնից բաղկացած: Դիմանքի գիւղերի մէջ յիշենք Արտգունք, Սաղուն, Հեղին, Մազրէ, Կարմիր Արտ և Բնկուզնակ գիւղերը:

Ընկուզնակ և Հեղին գիւղերը գտնվում են միենոյն գետակի վրա, որ սկիզբն է առնում Արքնաղբիւրի և Անդօքի շղթայից: Այդ շղթան, պայտ անելով, իր կողերով հասնում է արեմտեան կողմից մինչև Հեղինի սահմանները: Այս աել, Հեղինից վերև, կամիէզարսէ սարերում ընկաւ Շէնքը գիւղի ոչս, քաջ Գրգոն, սասունցիների պարձանքը, երբ թողեց Անդօք սարը, ուր պաշտպանվում էին երկար ժամանակ սասունցիները, և ելք էր որոնում թշնամիների ձեռքից աղատելու իր խումբը:

Դուլփ գաւռակը համարեա չէր մասնակցում առաջին կոտորածին, բայց նա էլ ենթարկվեց աւելումների թէ քիւրդերի և թէ գորքի կողմից: Դուլփի մերձակայ մասում յայտնի են Գեղարվան, Ահրօնք գիւղերը, Փոքր ինչ հեռու ինուր, Մործուր, Ընձքար գիւղերը և այլն: Դուլփի մէջ շատ կան քիւրդեր, որոնք կազմում են ամբողջ գիւղական աղքարնակութեան մի երրորդական, իսկ երբեմն և կէս մասը:

Գէտք է նկատել, որ սասունի գիւղերը շատ

անգամ կազմված են լինում մի քանի թաղերից կամ բաժիններից, որոնք ունենալով իրանց մասնաւոր անունները, միասին յայտնի են գիւղի ընդհանուր անունով: Այս հանգամանքն է պատճառ այն մեծ տարբերութեան, որ կան վիճակագրական թուերի մէջ: Մէկը հաշվում է, օրինակ, Դալորիկ գիւղի տների թիւը 30—40, միւսը հասցնում է՝ մինչև 200—220-ի: Դա նշանակում է, որ բուն կենտրոնական գիւղը ունի 30—40 տուն, իսկ իր թաղերով միասին 200—220:

Այսեղ առաջ ենք բերում գիւղերի մեծութեան վերաբերեալ հետեւեալ վիճակագրական տեղեկութիւնները: Գելիեգուղան գիւղը ունի մօտ 200 տուն, Շենըկ՝ մօտ 100, Սեմալ՝ մօտ 80, Ալիան՝ մօտ 160, Գելիեգենման 30—40 տուն:

Դալորիկը ունի բուն գիւղում 30—40, շըրջակայ տեղերով մինչև 180—200 տուն, Հաքմաք բուն գիւղում 20—25, շըրջականներով մինչև 80 տուն, Սպղանք 80, Աղբիկ 65, շըրջականներով 150 տուն, Հեթինք 60—70, Դվալինք 15—20, շըրջականներով մինչև 60—70 տուն, Հարթք 20, շըրջականներով մօտ 50, Հօղինք 40, Փորիս 15, Հօնուտ 15 տուն:

Դիանքի մէջ Իշխնձորը ունի 70—80, շըրջականներով 170—200 տուն, Ընկուզնակ 60, Սկիթ 70, Արտղունք 80, Կարմիր Արտ 20, Մաղրէ 30, Մաղուն 200, Փարգա 300, Հեղին 80 տուն:

Դուլիի մէջ Գեղարգանը ունի 60—70 տուն, Ահրօնք 150—160, Ընձքար 240, Կոկնաձոր 35 տուն և այլն:

Աւելացնենք դրանց վրա և հետեւեալ գիւղերը: Սաֆօի տուն 17, Արդիկ 80, Շուղեկ 20, Շուշնամերկ 30, Քեղաշէն 40, Ներքին Կոլիկ 30, Փոշկանձիք 15, Կիպերնին 30, Տափքար 30 տուն և այլն:

Այս թուերը ճիշտ են միայն մերձաւորապէս, որովհետեւ վիճակագրված են ընդհանուր ձևով, պատմողների ստացած տպաւորութիւնների հիման վրա: Յամենայն գէպս՝ յիշատակված գիւղերի շրջանում ապրում էին ոչ պակաս քսան հազար հոգի հայ, որոնցից մի նշանաւոր մասը կոտորվեց, կորսւ կոտրածի ժամանակ, իսկ մնացածները ցրվեցին զանազան կողմեր, սպասելով իրանց վիճակի պարզվելուն:

Գրբոյկիս ներկայ երրորդ հրատարակութեան մէջ առաջ կը բերենք և հետեւեալ տեղեկութիւնները, որ վերցրել ենք քաղաքական մամուլից:

I. Շ Ա Տ Ա Խ

	տուն		տուն
	հայ քիւրդ		հայ քիւրդ
Կերմա . .	30 —	Շուշնամերկ .	25 —
Քօփ . . .	45 —	Սեմալ	65 —
Իրիցանք .	10 —	Շէնըկ	55 —
Տափլի . .	17 9	Գելիկգանման	15 —
Գիւղաշէն	15 —	Գելիեմսուր .	20 3

Բնդամենը 297 տուն հայ և 12 տուն քիւրդ,

II. ԳԱԼԻԱՌ ԿԱՄ ՄԻԶԻՆ ՄԱՍ.

	տուն		տուն
Հայք քիւրդ	հայք քիւրդ	Աղբի . . .	80 —
Գելիեզուզան 120 —		Աղբի . . .	80 —
Ալիանք . . .	60 —	Իշխանձոր	50 —
Հնդամինը 310 տուն հայ:			

Գելիեզուզան թագավորում է հետեւել թաղերի՝ Խարձնպոմ, Տաղվրնի, Ղարիբջան, Միկթար, Մղրէսան, Հօսիլներ, Հրւաչյացիր, Խառոփ Մղրէն, Կալրգիկ, Տահօլներ, Ռաշըներ, Ամբարներ, Խօզօքներ, Մէրկէր, Հալմօի Գոմեր, Փաւլի Գոմեր, Ալօճակ և Եկեղեցւոյ թաղ կամ բուն զիւղ, Թաղերից մի քանիսը Բուն զիւղից մէկ ժամ հեռու են գտնվում:—Աղրիի թագանմունքներն են Աղբի, Խտան, Թիկիկ և Կալառաշ:—Իշխանածորը ունի չորս թաղեր՝ Կալիք, Նորհան, Խուզրկուարտեր և բուն զիւղը:—Ալիանք առաջ համարվում էր Գելիեզուզանի մի թաղը, իսկ յետոյ զատվեց, կաղմելով առանձին զիւղ, որ ունի ութ թաղ:

III. ԾՈՎԱՍՍԱՐԻ ՓԷՇԵՐ.

	տուն		տուն
Հեթինք . . .	35 —	Հոսներ . . .	1 —
Խոճոծվանք	8 10	Քարավանք	3 —
Արգիկ . . .	10 —	Խլովվիս	8 —
Հարկորք . .	15 8	Քորախու և	
Քրդամանք	15 —	Արտխու	12 —
Հաւկոնք . .	6 —		

Հնդամինը 113 տուն հայ և 18 տուն քիւրդ:
Ծովասարի փէշերի զիւղերը, քիւրդերի ընդ-

Հարումներին դիմանալ չը կարողանալով, ցիրուցան են եղել թողնելով այն, ինչ որ այստեղ յիշված է:

IV. Դ Ա Լ Ի Օ Ր Ի Կ.

	տուն հայ		տուն հայ		տուն հայ
Հողինք . . .	25	Դաւլօրիկ . .	25	Հագմանք . .	10
Դւալենք . .	15	Աղրվինք . .	15	Փորխ . . .	15
Հոսնուտ . .	4	Հարթք . . .	10	Սպաղմանք . .	25
Չորեք . . .	3	Եղկարտ . . .	12		

Հնդամինը 174 տուն հայ:

V. ԲՈՒԿԱՆԱՑ ԳԱԼԻԱՌ

	տուն հայ		տուն հայ		տուն հայ
Դաժպետրիկ . .	4	Մարսթօ . .	10	Մըթենք . .	22
Բաջառինք . .	15	Կոռընկէս . .	7	Բսանք . . .	9
Թարուկ . . .	14	Տալհօր . . .	3	Փշուտ . . .	5
Միջգեղ . . .	28	Խնձորիկ . .	23	Զըթնիկ . . .	18
Պէլօնք . . .	6	Մղրէ և կրէձոր	12	Գոմք . . .	18
Թաթունք . . .	6				

Հնդամինը 200 տուն հայ:

VI. Դ Ի Ա Ն Ք.

	տուն		տուն
	Հայք քիւրդ		Հայք քիւրդ
Պերմ . . .	80 —	Սաղտուն	30 —
Արխոնդ	20 —	Հեղին . . .	15 —
Պահամտա	20 15	Արտկունք	30 —
Արսըք . . .	15 10	Ընկուգնակ	40 —
Փառկա . . .	40 —	Մէկիթ . . .	30 —
Հնդամինը	320 տուն հայ	և 25 տուն քիւրդ:	

VII. Ղ Ո Ւ Լ Փ.

	տուն		տուն	
	հայ	քիւրդ	հայ	քիւրդ
Գեղերվանք	80	—	Փասուր . .	40 40
Ահարոնք .	60	—	Էհուր . . .	30 —
Շուղէգ . . .	15	10	Բնածքար .	80 —
Կասպէ . . .	50	50:	Բնդամենը	355 տուն հայ
և 100 տուն քիւրդ:				

Այս թուերից երկում է, որ Սասունի հայաբնակ մասը բաղկացած է 1769 հայ և 155 քիւրդ ընտանիքներից: Թէև հայ շրջանները քիչ բացառութեամբ ազատ են քիւրդերից, սակայն ազատ չեն նրանց դրացիութիւնից: Քիւրդերը բնակվում են Դուլիի, Դիանքի և Բուսանաց գաւառակների շրջակայրում:

Անկասկած՝ ամեն մի լուրջ ընդհարումից յետոյ գիւղական ազգաբնակութեան կազմը զգալի փոփոխութիւնների է ենթարկվում:

II.

Փողավրդի առանձնայատկութիւններ: — Սասունցու բաշուրիւնք: — Մրբատեղներ եւ աւերակներ: — Հագուստը: — Խախան կուժիկը: Տները: — Քիւրդեր եւ նրանց յարաբերութիւնները հայերի նես:

20

Սասունի ժողովուրդը ապրում է նահապետական կեանքով: Մի տան մէջ կարելի է տեսնել 10—20, իսկ առանձին գէպքերում մինչև 40 և աւելի հոգի:

Սասունցիները համարեա մշտապէս իրանց գիւղերումն են ապրում: Որբան և ծանր լինի նրանց կեանքը, որքան և գծուարութեամբ հայթայթում լինեն նրանք իրանց ապրուստը, այնու ամենայնիւ նրանք աշխատում են մնալ իրանց գիւղերում, պանդխտութեան չը դիմել:

Սասունցին աշխատասուէր է, սակաւապէտ ը, ը աշխատապահ: Իր զարմանալի աշխատասիրութեամբ և իր անընկճելի տոկունութեամբ նա կարողացել է կուլտուրական բարդաբեալ կեանք և արդիւնագործութիւն ստեղծել իր երկրում, մինչդեռ նրա գարաւոր հարևան քիւրդը գեռ ապրում է նախնական աստանդական կեանքով և ոչ միայն չէ աշխատում նմանել հային, այլ և յաճախ քանդում է այնուինչ որ շինել է հայը: Սասունցին իր քաշութեամբ պահպանել

է շատ հին ժամանակներից: Նրան նպաստել են և հայրենի անառիկ լեռները, և անանցանելի ձորերը, և սերունդից սերունդ անցնող ազատասիրութիւնը: Խաչնարածութիւնը, որ տարածված է Սասունի ազգաբնակութեան մէջ, վարժեցրել է մարդուն պաշտպանել իրան և իր հօտերը թշնամիների յարձակումներից: Սասունցի, ոչ միայն մատադահաս երիտասարդները, այլ և յաճախ հասակաւորները ունեն իրանց վարժութիւնները՝ պատերազմական ոգի և ընդունակութիւն զարգացնելու համար: Ազատ և տօն օրերը նրանք փորձնական յարձակումներ են գործում միմեանց վրա մեծ մահակներով և պաշտպանվում են վահաններով: Այդ վահանները, որ կոչվում են մարթալ, պատաժ են հաստ կաշիով, որի վրա գամկած են հաստ մեխեր, լայնագլուխ բնեուներ: Այդ վահաններով սասունցին երբեմն փորձում է նոյն իսկ հրացանի գնդակները կասեցնել իր անձից: Կարիճ մարդը շատ յարգված է Սասունում և սասունցիները երկար տարիներ պահպանում են հին կըտրիճների յիշատակները: Շենքիցի հոչակաւոր Գրդոյի և ուրիշ շատ անուններ, իրեկ սրբութիւններ, պատում են այժմ սասունցիների բերանում: Գելիեգուղանցիներից շատերը իրանց ոչս Աւէի հետ միասին՝ անջնջելի երեսներ գրաւեցին Սասունի պատմութեան մէջ:

Քաջութեան մէջ յետ չէ մոռւմ և սասունցի կինը, որ զիտէ ոչ միայն մահակով կովել, այլ և երբեմն նաև հրացան գործածել: Վերջին կոտորածների ժամանակ շատ կանայք հերոսաբար

կոռւեցին տղամարդկանց հետ միասին:

Իրեւ նահապետական ժողովուրդ՝ սասունցիները ամենայն ճշտութեամբ պահում են թէ կրօնական և թէ այլ տեղական սովորութիւնները: Պաս պահել, ուստ գնալ, տան մէջ ընդունված, սահմանված կարգ ու կանօնը կատարել, պարտաւորեցուցիչ են իւրաքանչիւր սասունցու համար: Սասունցին ունի և շատ նախապաշարմունքներ և կուապաշտութիւնից մնացած հաւատալիքներ: Նա առանձին երկիւղածութեամբ է վերաբերվում աւերակներին, հին տաճարներին, խաչքարերին:

Սասունի ժողովրդի մէջ զանազան աւանդութիւններ են պատմվում հին իշխանների և թագաւորների մասին: Սասունի ժողովրդի բերանում պահպանվել է և հին հայկական դիցազներգական վէպի մի հրաշալի մասը, այն է՝ Դաւիթ և Մհերը: Բաղրմուտի մօտ եղած բերդի աւերակները և հին պարիսպների մնացորդները յիշեցնում են ժողովրդին անցեալ օրերի մասին: Մի հին բերդ կայ և կալասրընդ ասված տեղում:

Յայտնի են հետեւեալ սրբատեղինք. Խութի սուրբ Աղքարիկը, որի մասին վերև յիշեցինք, սուրբ Թէոդորոս, որ գտնվում է Կալասրընդի մօտ, Մատին Առաքեալ՝ Բուն Սասունում, Գոմք գիւղի մօտ: Անդօք սարի գլխին կայ նոյնպէս մի ուխտատեղ: Գելիեգուղան գիւղից ոչ հեռու, Ալիւան գիւղի մօտ, Ամբքնին կոչված տեղումը, կան բազմաթիւ խաչքարեր, որոնց վրա գտնվում են արձանագրութիւններ: Նշանաւոր է և ս. Յովհաննէս վանքը:

Սասունի ժողովրդի լեզուաբարբառը պարունակում է իր մէջ շատ հին հայկական բառեր և սաստիկ տարբերվում է ուրիշ բարբառներից: Նոյն իսկ Սասունի գիւղերում միատեսակ չէ լեզուն: Դալորիկի ժողովրդի բարբառը բաւական տարբեր է այն բարբառից, որով խօսում են շատախցիները, օրինակ, Գելիեգուղան, Շենըկ գիւղերը: Հուլիսի և Ղիանքի բարբառը աւելի մոտ է Շատախի բարբառին: Սրանցից տարբեր է Մուշի դաշտի ժողովրդի բարբառը: Սասունցիների խօսակցական լեզուի մէջ շատ անգամ լսվում են և բիւրդական բառեր: Այդ լեզուի մասին դադարիար կարելի է կազմել «Դաւիթ և Մհեր» վէպի վարիանտներից:

Սասունցու հագուստը շատ հասարակ է և աղքատ: Թէ տղամարդի և թէ կնոջ գլխաւոր զգեստն է շապիկը, որի վրա կանայք զցում են երկար շղարշներ, իսկ տղամարդիկ հափնում են կարճ վերնազգեստ: Տղամարդի շապիկը հասնում է մինչև ծունկը, շապիկի թևերը լայն են և նրանց ծայրերին կարված են նոյն կտաւից երկար երկրորդական վերջաւորութիւններ, Գործելու ժամանակ սասունցին այդ վերջաւորութիւնները կապում կշկում է և գձում զլսի վրայով դէպի ծոծրակը, դէպի վիզը և այդպիսով յարմարեցնում, որ շապիկի թեերը չը խանգարեն զործին: Կանանց շապիկները երկար են, մինչև գետին: Տղամարդիկ գլխներին գնում են զգակներ, քօլոցներ, արախչիններ, որոնց վրա փաթաթում են թաշկինակներ, կամ ծոպաւոր լաթեր: Այդ արախ-

շինները նրանք գնում են երբեմն պատրաստի, իսկ յաճախ գործում են կանայք տանը բուրդից և երբեմն մետաքսից: Կանայք զարդարում են գլուխները արծաթեայ և ոսկեայ դրամներով: Վերջին կոտորածի ժամանակ քիւրդիրը և թիւրքական վիճուրները, անողոք և անխիղճ կերպով յարձակվելով կանանց վրա, առաջին բովէից ձեռքները տանում էին դէպի նրանց ոսկեայ և արծաթեայ զարդերը և դուրս պոկում անամօթաբար:

Կոշիկները պատրաստվում են կամ կաշուց, կամ որ աւելի յաճախ է պատահում, կազմված են այծի մազից (խարուկ): Իսկ ձմեռները՝ ձիւնի վրա շրջագայելու համար՝ գործ է ածվում փայտեայ կօշիկ, որ կոչվում է լաքան: Դա հեռաւոր մի նմանութիւն ունի այն փայտեայ քօշերին, որ գործ են ածվում մի քանի տեղերում՝ բաղանիքներում: Դա փայտեայ մի տախտակ է, ոտի գարշապարի ձևով, բայց փոքր ինչ աւելի մեծ, որ ամրացնվում է ոտքերի վրա մի քանի կարգ կաշպիճներով, որոնք խաչաձև փաթաթում են ոտքը և կապում լաքանի զանազան մասերի հետ: Այդ լաքաններով ման եկած ժամանակը ոտքը շատ խոր չէ գնում ձիւնի մէջ և կարելի է դառնում երթեկներութիւնը:

Գիւղական տները Սասունում շինված են հողի մակերեսոյթից բարձր: Շատ տեղերում կան երկու յարկանի տներ, պատահում են նոյնպէս և երեքյարկանիներ, օրինակ, Դալորիկում: Տներում աշխատում են մաքրութիւն և կարգ ու սարք պահպանել: Հարուստ տները ունեն յարմա-

բութիւններ հիւրերի համար:

Հայերի հարևանները քիւրդերն են: Բացի քիւրդերից այդ տեղերում չը կայ մի այլ տարր՝ ոչ ասօրի, ոչ եզիդի, ոչ թիւրք: Սասունցինները թիւրք տեսնում են բացառիկ դէպքերում, երբ կառավարութիւնը ուղարկում է աստիճանաւորներ, պաշտօնեաններ: Բայց վերջին տարիններու սասունցինները չար բազդ ունեցան տեսներու մեծ քանակութեամբ թիւրքերի, որոնք զինված, զրահաւորված գալիս են իրք թէ խաղաղութիւն վերականգնելու, ոտի տակ տալով ժողովրդի դարաւոր իրաւունքները, խեղելով նրա հասաչանքները և աւերելով ծանր ու մաշող աշխատանքով տարինների ու դարերի ընթացքում կասուցած գիւղերը և տները:

Քիւրդերը համարեա բացառապէս մահմետական եր են, սիւննի աղանդին պատկանող: Մենք ասացինք համարեա թէ այն պատճառով, որ նրանց մէջ կայ մի ցեղ, որ զանազանվում է միւսներից և իրան մօտ է զգում հայերին: Դաքալաքցի քիւրդերի ցեղն է: Բալաքցինները ապրում են ըստ մեծի մասին Շատափի և Խութի շրջաններում, մի քանիսներն էլ Խարզանի և Մարաթուքի կողմերում: Բալաքցինները ունեն իրանց ներքին ճիւղաւորութիւնները, տեղերի կամ իրանց գլխաւորների անուններով: Նրանք շէյլս, մուլլա չունեն, առանձին տաճարներ, կամ աղօթատներ չեն շինում, խօսում են արաբական մի բարբառով, սերտ յարաբերութիւններ ունեն հայերի հետ և համարեա բոլորը գիտեն հայերէն: Նրանք ասում են, որ առաջ իրանք հայ են եղել և միայն հան-

գամանքներից ստիպված հեռացել են, երկար միշտոց ծպտված պահպանելով քրիստոնէութիւնը. սակայն ժամանակի ընթացքում կամաց կամաց օտարացել են: Նրանք սպասում են, որ հայի համար մի երջանիկ օր լուսանայ. այն ժամանակ նրանք էլ բացարձակ կը միանան հայերի հետ: Բալաքցի քիւրդերը քաջ ժողովուրդ են և միշտնանց պատիւը ու շահերը խիստ պաշտպանող:

Մահմեղական քիւրդերի հետ ևս սասունցինների յարաբերութիւնները առաջուայ ժամանակշները լաւ էին, բարեկամական, մտերմական: Միայն վերջնն երկու տասնեակ տարինների ընթացքում քիւրդերի մէջ սկսեցին երևալ քարոզիչներ, որոնք վառում էին նրանց մէջ կրօնամօլութիւն, ֆանատիկոսութիւն և սերմանում էին ատելութիւն դէպի այլակրօնները:

Ճիշդ է, ընդհարումներ հայերի և քիւրդերի մէջ մշտական եղել են, բայց այդ ընդհարումները ունեցել են մասնաւոր, տեղական, դիպուածական բնաւորութիւն, այնպէս, ինչպէս քիւրդը կովում է քիւրդի հետ, խաչնարածը խաչնարածի հետ: Միքանի մարդ կը սպանվէր այս ու այն կողմից, մի կերպ վրէմբը կը լուծվէր և ամեն բան կարգի կընկնէր: Սասունցինները այդ ընդհարումների մէջ իրանց շատ քաջ են պահել միշտ և այդպիսով են կարող պացել պահպաններանց դիրքը հայրենի լեռներում:

Քիւրդերը այս անգամ էլ չէին համարձակվի հայերի դէմ արձակ կոտուի ենել, եթէ յենարան չունենային թիւրքաց կանոնաւոր զօրքի ներկայութիւնը: Այդ զօրքը ոչ միայն խրախուսում էր

նրանց բարոյապէս, այլ և նպաստում էր նիւթապէս, մատակարարելով պատերազմական մթերքներ, զենքեր ու փառօդ: Շատերը քիւրդերից այժմ սաստիկ գղջում են, որ իրանց թոյլ տուին խարվելու և իրանց հարևանների հետ կառւելու:

Բայց քիւրդերի մի մասը իսկապէս փանատիկոսացաւ: Կատաղի թշնամիներ զարձան վերջերս հետևեալ ցեղերը՝ բաքրանցիներ, վալքանցիներ, շեղանցիներ, ինըկացիներ, խարթկամացիներ և այլն: Այդ քիւրդերը ըստ մեծի մասին ձմերում են Ներքին Դաշտ ասված տեղում, որ գտնվում է Դալորիկից հարաւացած և տաք տեղերում: Իսկ ամառը բաքրանում են Սասունի շրջապատ լեռները—բաքրանցիներ և վալքանցիները՝ Շատամի լեռները, բագրքանցիները՝ Դալորիկի կողքին, ո. Յովհաննէսի վանքի լեռները և այլն:

Հուլիփի մօտ եղած քիւրդերը, որոնք ապրում են աշխաթային մեծ կազմակերպութեամբ, համեմատաբար քիչ մասնակցութիւն ունեցան առաջին կոտորածների ժամանակ: Նրանց մէջ յայտնի են քանըքացիներ, խօշկանցիներ, նադարանցիներ:

Բուն Սասունի, Բագրմուտի կողմերում, Ծովասարի շուրջը և գէպի Մարաթուք ցրված են խարզանցի, խճաւդալցի քիւրդերի զանազան ցեղերը: Այդաել յայտնի է քիւրդերի մէջ հարուստ և տոհմաւոր քիւրդ Խշմանաւղան:

Սասունից հեռու են ապրում ալմանցի, հայդարանցի և այլ ցեղերը և նրանք բացառիկ ընդհարումների ժամանակ են միայն երեսում Սասունի մօտերքը, իրեւ զինակիցներ այս կամ այն

արիւնակից և բարեկամ քիւրդերին:

Սասունի քիւրդերի մէջ այժմ յայտնի են երկու շէյխ եր, Զիլլանում ապրող շէյխ Մահմադը և Դուդարում (Հեղինի մօտ) ապրող շէյխ Ամարը: Դրանք քիւրդերի առաջնորդներն են, կամ ինչպէս սասունցիներն են ասում, քիւրդերի եպիսկոպոսները: Առաջին կոտորածի նախապատրաստական գործողութիւնների մէջ այդ շէյխերը ունեցան մեծ մասնակցութիւն: Նրանց հետ էր խորհրդակցում Քիթլիսի նախկին նահանգապետ և տիրահռչակ բաղաքագէտ Թահու ին-փաշան:

Քիւրդերի մէջ հողագործներ քիչ կան: Նրանք պարապում են ըստ մեծի մասին խաշնալրածութեամբ: Բաքրանցիների մէջ պատահում են մինչև 1000 գլուխ ոչխար պահողներ: Քիւրդերից պատահում են հովիւներ և ծառաներ հայկական գիւղերում, թէև ոչ մեծ քանակութեամբ: Բայց հայերից համարեա երբէք չէ պատահում ծառայող քիւրդի տանը: Սասունի հայաբնակ գիւղերում երբեմն պատահում են մի քանի տուն քիւրդեր: Նրանք վերջին ընդհարումի ժամանակ ձեռնապահ էին մնում և չը միանալով քիւրդերի հետ չէին վնասում հայերին:

Հաղորդելով Սասունի աշխարհագրական գիրքի և նրա մէջ ապրող ժողովրդի մասին այս համառօտ տեղեկութիւնները, անցնենք Սասունի տնտեսական վիճակի նկարագրութեան, ներկայացնելով նախ հարստութիւնը, որ տալիս է բնութիւնը և ապա այն արդիւնաբերութիւնը, որ սասունցու աշխատանքի և մշակութեան արգասիքն է:

III.

Բնութեան տուրբերը եւ հարստուրի նները: Մանանայ—Անսառները:—Դահուկներ, —Լեռնալին բուսականուրիւն: Կազ եւ նրա գործածուրիւնը:— Ընկուզենիւնը:— Հաներ—Հողը, նրա ուրակուրիւնը եւ բանալուրիւնը:— Արենսական արտեր եւ այգիներ:— Հողի պարարտացնելը:

Մասունը մանանայի երկիրն է:
Մանանան իջնում է յուլիս ամսին: Որքան խոնսաւ է օդը, այնքան առատ է մանանան: Նա չէ թափվում իրբեանձրեւ և ձիւն, այլ ցողի նման կամաց-կամաց, աննկատելի կերպով, ծածկում է ծառերի տերեները, կազի թուփերը: Այն օրերը, երբ պէտք է մանանան նստի առատ կերպով, օդը մաքուր չէ լինում, այլ լցված բարակ մառախուզով, կարծես մի տեսակ մշուշով վարագուրված: Մարդու շորեր նոյն իսկ փոքր ինչ թրջվում են:

Մանանան, կամ ուրիշ անունով կազը անսպիտակ է, թերի նման, 2—4 սանտիմէտր երկարութեամբ: Նրա հաստութիւնը կարող է լինել ձիւ ազիի մի կամ երկու մազի հաստութեան: Կազի թուփերի վրա նա բաւական չոր է. իսկ ծառերի տերեների վրա, օրինակ, լողիկի վրա, թաց կազի թուփերից նրան թափ են տալիս մի շորի,

OF BOJ

թէ կոսու, կամ մազի մէջ և ապա ձեռքով ժողովելով՝ գունդ անում, իսկ ծառերի տերեներից նրան ստանալու համար՝ լուանում են ծառերի ճիւզերը նրանց վրա եղած տերեներով հանդերձ և հիւթը ժողովում ամանների մէջ, ուր մանանան կամաց-կամաց նստում է, իսկ ջուրը վերքարձրանում:

Հում մանանան համեղ չէ և ծանր է ստամքսի համար: Եփելուց յետոյ մանանան դառնում է մեղրի նման համեղ:

Թէ կազի թուփերից ժողոված և թէ ծառերից լուացած մանանան ածում են կաթսաների մէջ, գնում կրակի վրա և եփում, լաւ խառնելով: Երբ նա բաւական եփվեց, ածում են նրան օշնակների, կարամների մէջ և պահում: Շատերը նրան վերագասում են մեղրից և բուփից: Ուտում են իւղի հետմիասին հացով:

Իւրաքանչիւր տուն ժողովում է մանանայ 5—15 լիտր: Երբեմն տանում են նրան Մուշ ծախելու: Նրա լիտրը արժէ 8—10 դուրուշ:

Միջանկեալ կերպով անհրաժեշտ եմ համաբում հաղորդել, որ մանանայ գոյանում է Փոքր-Ասիայի և մի քանի ուրիշ անդերում: Այդպիսով հին երրայեցիների երկնառաք մանանան անսալատում ընական մի երևոյթ է ներկայանում: Նուրերս ենայի պրօֆեսօր Շէպֆէլդ իր ճանապարհորդութեան ժամանակ ականատես էր եղել մանանայի իջնելուն Սինա սարի վրա:

Մանանայի գոյանալու վերաբերութեամբ

գիտնական ենթադրութիւն կայ, որ նա ոչ այլ
ինչ է, եթէ ոչ տամարիքս (Tamarix Mannifera)
կոչված ծառի հիւթը, որ արտաթորվում է կա-
թիլ-կաթիլ, ցամաքում ծառի կեղեի վրա և յետոյ
քամու միջոցով փոխադրվում հետու տեղեր, մինչև
որ կիջնի ներքեւ և կը նստի ծառերի կամ հողի վրա:

Հիւթի արտահոսութեանը նպաստում է մի
փոքրիկ որդ՝ Coccus Manniparus անունով, որ
ծակծկում է ծառի կեղել և այլպիսով ճանապարհ
բաց անում հիւթի արտաթորման համար: Հիւթը
դուրս է գալիս, ինչպէս ասացինք, կաթիլ-կաթիլ
և ցամաքում: Ամենաառատ կերպով մանանան
գոյանում է յուլիսին և օգոստոսին: Նկատված է
և այն, որ մանանան աւելի յաճախ գիշերն է
նստում, քան ցերեկը:

Սակայն պէտք է խոստովանել, որ մանանայի
գոյանալու բոլոր երկոյթները գեռ ձիշտ կերպով
չեն ուսումնասիրված մինչև այժմ:

Սասունը հարուստ է անտառներով և
այգու ծառատուններով: Մեծ անտառներ կան
Սեմալի մօտ, Դալորիկի սարալանջերում, Ղուլիի
գիւղերի սահմանում, Ընձքարի մօտ: Անտառները.
թէե շարունակ կտրտվում են գիւղացիների պէտ-
քերի համար, բայց նրանք շուտով վերականգ-
նում են: Սասունը ջրառատ երկիր է: Զմեռը
նստում է խոր ձիւն, իսկ գարնանը գալիս են
յաճախ անձրևներ: Անտառի բուսականութեան
սերմերը շուտով արմատանում են, հին ծառերի
տակից ծլում են նոր ձիւղաւորութիւններ և

լրացնում են անտառի պակասը:

Անտառի փայտը ծառայում է իբրև վառելիք,
իսկ ծառերի տերեները՝ իբրև կերակուր տնային
կենդանիների, զլիսաւրապէս, ոչխարի և այծի
համար: Տերեկի պատրաստութիւնը կատարվում է
օգոստոսին և սեպտեմբերին, երբ գիւղացիները
վերջացնում են ամարային պարապմունքների մեծ
մասը: Գիւղացիները այդ ժամանակ խմբերով գնում
են անտառ և քշուշով կտրտում են ձիւղերը
ու գետին թափում: Յետոյ այդ ձիւղերը խուրձ-
խուրձ կապում են և թողնում գետնի վրա մօ-
տաւրապէս մի տասն օր, որպէս զի ձիւղերը և
տերեները չորանան: Այնուհետև դէղ են անում
այդ խուրձերը և այլպէս պահում մինչև ձմեռ,
երբ պէտք է ոչխարին և այծին տանը կերակրել: Այդ ժամանակ գիւղացիները առնում են իրանց հետ
դահուկ կներ, որոնք բալխիրների նմանութիւնն
ունեն (ոռւսական ձրօնի և սահների ձևով), և
անտառից տուն են կրում ձիւղի և տերեկի խուր-
ձերը: Զիւնի վրայով գահուկները շատ թեթև են
շարժվում և մարդիկը առանց կենդանիների օգ-
նութեան, իրանք կարողանում են առանց մեծ
գժուարութեան տուն բերել խուրձերը: Ոչխար-
ները ուտում են տերեները և շատ բարակ ըն-
ձիւղները: Մնացած ցախը գործ է ածվում իբրև
վառելիք:

Լեռնային բուսականութիւնը բազմազան և է
հարուստ: Շատ տեղերում նա այնքան ճոխ բուս-
նում է, որ նրան հնձում են իբրև խոտ և չորա-

ցնում. իսկ յետոյ նոյն հողի վրա արածացնում են անասուներին: Երեքնուկով (Trifolium—խնձորախոտ) ծածկված արօտները սննդաբար կերակուր են մատակարարում կենդանիներին: Կավլօ (լուպին) բոյսով առաստ տեղերի խոտը պահվում է ոչխարի, այծի և ծնած մաքիների համար:

Լեռներում և դաշտերում շատ բոյսեր կան, որոնք գործ են ածվում և մարդկանց կերակրի մէջ: Գարունը բացվելուն պէս, հազիւ ձիւնը հալվում է, բուսնում է օդինը, որ ժողովում են դաշտերից, եփում և ուտում: Օղինի արմատը շրջն է, որ գործ է ածվում մանածի համար, իբրև սոսնձանման նիւթ:

Սնդօք սարի կողքերում շատ է բուսնում խաւը ծիլ բոյսը, որ ունի յայնատարած տերեներ և ուղղաձիգ երկայն զօխ, որ վերջանում է մի փոքրիկ թուփով: Խաւը ծիլ ժողովում են և ուտում:

Սասունի լեռներում, մանաւանդ արեգունի տեղերում, շատ է բուսնում կազ, որ թփանման փուշ է և գործ է ածվում իբրև վառելիք, բայց մանաւանդ իբրև կենդանիների համար կերակուր:

Կազ փուշը (Astragalus), ինչպէս յայտնի է, տարածված է և Անգրկովկասում, մանաւանդ երեանեան նահանգում, բայց Սասունի կազը աւելի խոշոր տեսակիցն է և բուսնում է շատ մեծ քանակութեամբ: Կազի խոշոր տեսակի թիւը այնքան մեծ են, որ երբեմն մի թուփը արդէն կազմում է մի շալակաբեռն, իսկ ընդհանրապէս

8—10—12 հատն են կազմում մի շալակ: Կազը ունի գեղեցիկ մանխշակագոյն և դեղին ծաղիկներ, որոնք թաղված են փուշերի ծոցում: Այդ ծաղիկները համեղ կերակուր են ոչխարների համար: Կազ կտրտելու համար գործ է ածվում դարձեալ քուշ, որ ոչ այլ ինչ է, եթէ ոչ մի հատոց կամ մի հաստ դանակ կեռ ծայրով: Կազը նախ վառում են և փշային մասերը այրում, յետոյ մնացածը՝ բունը և ծիւղերը՝ կտրտում են շատ մանր կտորներ անում և ապա այդպէս տալիս են կենդանիներին, և այն ըստ մեծի մասին եղներին՝ երեկոյեան ժումին: Կազը մեծ ոյժ է տալիս եղներին, չաղացնում և ամրացնում է նրանց: Կովի և ոչխարների համար նա նոյնպէս օգտակար է, իբրև կազդուրող կերակուր, բայց կաթի յատկութեանը ֆնասում է. կաթը ստանում է մի առանձին դառնութիւն: Նկատված է, որ կազ շատ ուտող կենդանու մին էլ ունի զառն համ:

Կազից ստացվում է մի առանձին տեսակի խեժ, որ յայտնի է կազիս եժ անունով: Սասունցիները առանձին ուշը չեն զարձնում այդ խեժի վրա. մի քանի մարդիկ միայն զբաղվում են նրա ժողովելով և ծախում են գիւղերում կամ Մուշում՝ նուկին $1\frac{1}{2}$ գուրուշ, լիտրը 18 զուրուշով:

Օգտվում ենք գէպքից յայտնելու, որ կազի խեժը լաւ զին ունի եւրօպական շուկաներում և գեղատաներում և եթէ սասունցիների մէջ գլունվեն մարդիկ, որ առանձին ուշը դարձնեն այդ խեժը ժողովելու գործի վրա, կարող են յայտնի շահ ունենալ: Վաճառքի մէջ այդ խեժը յայտնի է

թրագանթ անունով (Gummi Tragantha):

Կազի թուփերը, կտրտելուց յետոյ, արմատից դժուարութեամբ են վերականգնվում, բայց սերմերից շատ շուտ նրանք արմատ են բռնում և զարգանում:

Սասունի գիւղերի այգիներում, ձորերում շատ վաղ ժամանակից բուսնում են ընկուղենին եր որոնց կոճղերը վերջին ժամանակներս դարձրին իրանց վրա եւրօպական վաճառականների ուշադրութիւնը: Եւրօպացիները արդէն սկսել են արտահանել այդ կոճղերը: Նոյն իսկ մի քանի տեղերի անուններ ցոյց են տալիս, որ այդ երկրում ընկոյզ շատ կայ: Վերջին կոտորածի ժամանակ մեծ հոչչակ ստացած գիւղի անունը, Գելիինուզան, նշանակում է քրդական լեզուով ընկուղաձոր: Եւ յիրաւի, Գելիինուզանում շատ կան ընկուղենիներ և շարունակվում են ձորի ընթացքով: Ընկուղենի շատ կայ նոյնպէս Սպղանքում: Յիշենք և Ընկուղնակ գիւղը Ղիանքում:

Սասունը առատ է հանք եռով: Դալորիկի լեռնագոտիում թաղված են երկաթի մեծ պաշարներ: Այժմ յայտնի և մշակուղ երկաթահանքերից գլխաւորը գտնվում է Հլողենց սարում: Դալորիկի ժողովուրդը շատ ժամանականերից ծանօթ է հանքագործութեան: Կան գիւղեր, ուր ամեն տուն ունի հանքագործութեան վարպետներ: Հարդք գիւղում կար մի նշանաւոր վարպետ, որ գործնականապէս ուսումնասիրել էր

հանքագործութեան արհեստը և շահագործում էր մեծ քանակութեամբ երկաթ: Այդ վարպետը Խաչօյեան Գասպար անունով՝ առաջին կոտորածի ժամանակ իր որդու և հարսի հետ ձերբակալվեցին:

Սասունցին շատ ասացուածներ և երգեր ունի երկաթի և երկաթագործութեան մասին: Տարածված մի երգի մէջ ասված է,

Շինեմ փետատ, խուփ, խաչերկաթ.

Ծանը է գաղումս, բայց եմ աղատ:

Երկաթի հանքը համարվում է առատներից: Հանքը հալում են և երկաթը վերցնում: Տարեկան շահագործվում է 6—7000 փութ երկաթ: Բացի երկաթից կան և ուրիշ հանքեր, օրինակ պղինձ:

Սասունցիները ընդարձակ հողեր չունեն երկրագործութեան համար: Տափարակ դաշտեր և սարահարթեր թէւ կան, բայց մեծ մասամբ ընդարձակ տարածութիւն չունեն: Երկրագործութեան համար պիտանի հողերը կտոր կտոր ընկած են այս ու այն տեղ, ձորամէջերում, գետակների ափերին:

Ինչպէս մի անգամ յիշատակեցինք՝ սասունցին շատ տեղ հաց ցանելու և խաղող ու միրգ բուսցնելու համար արհետական արտեր և այգիներ է շիներ և այղպիսով կորզել ընութիւնից մշակութեան համար հողեր:

Արհետական արտ կամ այդի շինելու համար սասունցիները ընտրում են լեռնային լանջերից յարմարը՝ ջրելու և երթեկելելու համար: Այդ լանջերի ներքին կողմից որմն են բարձրացնում քար ու ցեխով, երբեմն էլ քար ու կրով

Յետոյ այդ զառիվայրի ներքին մասում այնշաբան քար են կրում, որ այդ տեղի մակերեսոյթը հաւասար հօրիզոնական դիրք ըստանայ: Այնունետև այդ քարերի վրա ածում են խիճ, աւագ, հող, գետակների ափերից խոտախառն հող, և ճուղի, իսկ յետոյ պարարտացնում են այդ հողը աղբով:

Միջակ տունը ունի 20—30 քիլոտեղ հող, չքաւորը 5—15, հարուստը 40—60, բացառիկ ունկորները և աւելի:

Քիլան ուժ կող է: Այդ հողով պէտք է սասունցի բազմանդամ ընտանիքը կերակրվի ամբողջ տարին և կարողանայ իր տուրքերը հատուցանել:

Սասունի հողը ըստ մեծի մասին թոյլ, աւազախան տեսակիցն է: Նրան հերկելը մեծ ոյժ չէ պահանջում: Հողը առհասարակ կարմիր և գեղին գոյն ունի, բրդական խօսքով կավը դի: Հերկում են 2—3 վերջոկ խորութեամբ: Այստեղ գործ չեն ածում մեծ գութաններ: Հերկում են արօրով, որ պահանջում է միայն մի լուծ, այսինքն մի զոյգ եղէ

Սասունի հողը գարեր շարունակ մշակութեան մէջ լինելով, ուժասպառ է եղել և պահանջում է մշտական պարատացում: Վարելահողի քանակութիւնը համեմատաբար մեծ չէ և այդ հողը երբէք չէ հանգստանում, այլ անդադար մշակում է:

Հող պարարտացնելը յայտնի է այնտեղ ուժել բառով: Ուժելու համար գործեն ածում կենդանիների աղբը: Պէտք է նկատել, որ Սասունում փայտի առատութեան պատճառով, աղբից աթար-

ներ չեն պատրաստում վառելու համար, այլ բացառապէս նրան գործ են ածում հող ուժելու համար: Ամեն օր երկու անգամ գիւղացիները սըրբում են իրանց գոմերը և աղբը դուրս տանում ու գիղում մի տեղ, մինչև ձմեռվայ վերջը և գարունը, և յետոյ այն ժամանակ կրում են դէպի արտերը: Եթէ ձիւնը դեռ չէ անցել, աղբը կրում են դահուկներով դաշտ և այնտեղ թողնում մինչեւ վարեյու ժամանակ. իսկ եթէ գարունը բացվել է, այն ժամանակ կրում են կողովներով՝ բարձած էշերի վրա: Ի հարկէ, զահուկներով կրելը աւելի դիւրին է և արագ, վարելու միջոցին աղբը ցըրվում են հողի վրա հաւասարապէս և ապա հերկում հողը և ցանում: Պարարտի հաւասար տարածվելուն վերջնականապէս նպաստում է ջուրը, որով ոռոգում են դաշտերը:

Կայ հող ուժելու և մի ուրիշ միջոց, որ նոյնապէս յաճախ գործ է ածվում այստեղ: Այդ այն է, որ գիւղացին մի 20—30 օր գիշերել է տալիս իր անսասուններին այս կամ այն արտի վրա, յետոյ տեղափոխում նրանց գէպի միւս արտը: Կենդանիների դաղարից գոյացած պարարտը այնքան զօրութիւն է տալիս հողին, որ այլ ևս պէտք չէ զգացվում այլ կերպ ուժելու:

Սասունում վարելահողը և այգիները ըստ մեծի մասին ջրվում են և այն էլ՝ մի քանի անգամ. բուսականութեան աճման շրջանում երեք չորս և հինգ անգամ:

Այն տեղերում, ուր հողը չէ հերկվում և թողված է խոտի համար, ոչ ջրում են, ոչ ուժում:

Անձրեների խոնաւութիւնը բաւականութիւն է
տալիս բոյսերի աճման:

Գիւղական հողը Սասունի գիւղերում չէ բաշ-
ժանվում: Գոնէ այդ մասին գեռ խնդիր չէ ծագել
այդտեղի գիւղացիների մէջ:

Տիրած հողի տարածութեան համեմատ կար-
գաւորվում և բաժանվում են գիւղական հարկը և
տուրքերը: Գիւղերում մները իրանց կարողու-
թեան, իրանց հողատիրութեան համեմատ բա-
ժանվում են համփա, կէս համփա տներ:

IV

Հողագործութիւնը — հացահատիկներ՝ ցորեն, զլղել, կորեկ եւ
այլն: — Եւդ մատակարարող նիւթե՞ն կտաւաս, պղինջ եւ մրկիր —
Քամբակ եւ առւոյշ: — Մրգեր, — Անասնապահութիւն՝ կով, ոչ-
խար եւ այծ. — Կարնասենսութիւն: — Շերամապահութիւն: —
Մեղուաբուծութիւն:

Գարունը հրաշալի է Սասունում:

Հողը սևանում է Զատկի մօտերքը: Զիւնը
մնում է աւելի բարձր տեղերում, անտառներում
և լեռնային խոռոչներում: Հազարաւոր գետակներ
մնեն և փոքր հոսանքով տանում են ձիւնահալքի
և անձրեների ջրերը դէպի մնեն ձորերը և գետերը:
Ամեն մի քայլում գուը հանդիպում էք աղբիւր-
ների, որոնց ջրերի մասին անվերջ գովասանքներ
էք լսում. — «սա պաղ է մնում, ինչպէս սառուց,
ամբողջ ամառուայ ընթացքում, սա կաթնահամ
է, սա զարմանալի մարսական է, սա բուժող աղ-
գեցութիւն ունի»:

Արօտներ, խոտահարքներ և դաշտեր ծածկ-
վում են հարուստ, բազմազան բուսականութեամբ:
Մի տեղ գեղին ծաղիկներից ամբողջ երկիրը գեղ-
նել է, միւս տեղ նա կարսել է, երրորդ տեղում
նա ներկայացնում է բազմերանգ ծաղիկների մի
հազուագիւտ գորգ: Առատ ցողը հազարաւոր աղա-

մանդներ է թափում բոյսերի վրա և զօրաւոր կերպով նպաստում բոյսերի աճման:

Սասունի լեռնային մասերում ցանում են միայն հացահատիկներ և նրանց մէջ առաւելապէս կորէկ, գլգել: Իսկ աւելի տաք տեղերում, այն է ձորամէջերում և տափարակներում, բացի հացահատիկներից, ցանում են բամբակ, պահում են շերամի սրդ և պարապում են այգեպործութեամբ, խաղող և զանազան տեսակ մրգեր արդինաբերելով:

Սասունցիները հաց չեն ծախում ուրիշ տեղեր: Այնքան ցանում են, որ իրանց համար բաւականութիւն տայ: Հարևան հարևանից, գիւղ գիւղից, ի հարէց, գնում են հաց, նայած տարվայ բերքին և հունձին. իսկ անբերրի տարիները իշնում են Մուշի գաշտ՝ այստեղից հաց բերելու:

Երկրագործութեան մէջ այստեղ յայտնի են հետեւեալ հատիկները, հունդերը և բանջարները՝ ցորեն, գարի, կորեկ, գլգել, գիւրջլլիլ, կավարս, մուրթիկ, վազանա, կտաւատ, կանեփ, սիսեռ, գետնախնձոր «կարտոլ» շաղգամ, կաղամբ և այլն:

Յորեն ցանում են ամենքը, բայց քիչ քարձարագիր տեղերում, օրինակ, Շեմալ, Շենըկ, Գելիեղուզան գիւղերում, ցանում են աւելի սակաւ, քան Դալորիկի, Ղիանքի, Ղուլփի գիւղերում: Կորեկը պտղաբեր է և շատ է ցանվում: Գարի ամեն տեղ կայ, բայց սահմանափակ քանակութեամբ:

Գլգելը յատուկ է Սասունին և մասամբ

Մուշին: Դա ունի բարձր բուն, որի ծայրին գըլլիխայր կախված է կլոր, սպիտակ հատիկներով լի ողկոյզաձե մի գունդ, որ ունի շամամի մեծութիւն: Նա շատ պտղաբեր է և թէ տալիս է համեղ հաց և թէ գործ է ածվում ապուր պատրաստելու համար: Դալորիկում և Ղիանքում բունում են նրա ամենալաւ, խոշոր տեսակները: Գիւրջլլիլ ասելով սասունցիները հասկանում են սիմինդրը, կամ եղիպատացորենը. զա այնքան տարածված չէ:

Կավարս, մուրթիկ և վազանան տարածված են ոչ հաւասարապէս: Ամենից շատ տարածված է կավարսը, այնուհետև վազանան (Ղիանքում շատ են ցանում), իսկ ամենից քիչ՝ մուրթիկը: Այդ հատիկներից ամենախոշորն է կավարսը, ամենամանը վազանան, որ ունի սպիտակ կորեկի նման հատիկներ:

Այն հողը, ուր պէտք է ցորեն ցանվի, հերկում են կամ, ինչպէս սասունցիները ասում են, փեշիում են մի անգամ, իսկ կորեկի տեղը չորս անգամ: Ցորենի արտը ցաքում են ցանելուց յետոյ, իսկ կորեկինը՝ նախ ցաքով հաւասարեցնում են հողը և ապա ցանում:

Բերրիութեան, կամ հունձի առատութեան աստիճանը մերձաւորապէս այս տեսակ է. ցորենը տալիս է մէկին 10—15, գարին 5—10, գլգելը 200—400, կորեկը 60—100, կավարսը 300—500, մուրթիկը 150—200, վազանան 70—100, կտաւատը 8—15, կանեփը 70—100:

Կտաւատից ձէ թ են պատրաստում տան

գործածութեան համար: Կանեփը քիչ է ցանվում, Կտաւատի թելը գործ չէ ածվում. բայց կանեփի բունից պատրաստում են չուաններ տնային պէտքերի համար: Շատ յարգված է Սասունում և ընկոյզի իւղը, որ արդիւնաբերվում է բաւականաչափ: Զէթ պատրաստում են և պղինջքի ծառի պտուղներից (հատերից), լաւ ծեծելուց և քաշելուց յետ: Պղինջքից պատրաստում են նաև առանձին կերակուր:

Ի դէպ, կարելի է յիշել, որ անտառներում և արտերի մօտ բուսնում է մրկիթ (շանգիլ) ծառը, որի սկ, տափակ պտուղները պարունակում են իրանց մէջ մեծ քանակութեամբ ձէթ: Այդ ձէթը ուտելու համար գործածական չէ. բայց նա պէտք է գալիս տեղական սապօն շինելու համար:

Բոյսերը ցանելու ժամանակ աշխատում են փոքր ի շատէ փոփոխել նրանց տեղը: Ցորենից յետոյ ցանում են կորեկ, նրանից յետոյ դարձեալ ցորեն, կամ մի այլ հացարոյս: Միայն անջըրդի բարձրագիր տեղերում յաճախ ցանում են միմեանց վրա միայն գարի.

Բամբակ ցանում են Ղիանքի և Ղուլիի գիւղերում, որտեղ նա բուսնում է աջող կերպով: Մի քանի անգամ փորձեցին բամբակ ցանել և Գելիեգուզան գիւղում և ունեցան լաւ հետևանքներ, բայց բամբակի մշակութեան յարմար հողեր շատ չը կան այդ գիւղում:

Խոտաբոյսերից յայտնի է այնտեղ առւոյշը, որ ցանվում է բոլոր գիւղերում, բայց ոչ մեծ բանակութեամբ. իւրաքանչիւր մարդ աշխա-

տում է մի կամ երկու արտ առւոյտ ունենալ: Առւոյտը մի և նոյն տեղում անընդհատ բուսնում է 7—10 տարի: Առւոյտի քիչ ցանելու պատճառը այն է, որ նրա համար պահանջվող պետական հարկը ծանր է: Այն ինչ հացարոյսերի համար նշանակված է վերցնել վեց խուրձից մէկը. առւոյտի համար վերցվում է 30 խուրձից 100 դուրուշ, որ գիւղացիների համար ծանր է վճարել:

Խաղող չը կայ Շատախի գիւղերում: բայց կայ Դալտօրիկում և մանաւանդ Ղիանքում: Փառա գիւղի խաղողը մեծ ողկոյզներ ունի, պտուղները սղմուկ, մի ճութը դժուարութեամբ մի մարդ ուտում է: Գինին պարունակում է իր մէջ շատ ոգելից նիւթ, և շուտ հարբեցնում է:

Մը գատու ծառեր տարածված են բոլոր այն տեղերում, որ կան և խաղողի այգիներ: Հեղին գիւղը մանաւանդ յայտնի է իր զանազան տեսակ մրգերով. այդտեղ աջող կերպով բուսնում են թուզ, տանձ, լինձոր, ծիրան, թութ, սղինջը և ուրիշ տեսակ ծառեր: Գիւղացիները պատրաստում են պաստեր, ոռուի, չամիչ, օղի:

Անցնենք այժմ տաւարապահութեան, որ Սասունի գիւղերի տնտեսութեան մի շատ նըշանաւոր ճիւղն է կազմում, իսկ լեռնային մասում աւելի մեծ տեղ է բոնում, քան նոյն իսկ հողագործութիւնը:

Տնային անասուններից պահում են կով, եղ, ոչխար, այծ, ձի, ջորի, էշ, որոնք ծառայում են անային պիտոյքներ հոգալու, մատակարարելով

միս, կաթ, իւղ, բուրդ, իսկ ոչխարը բացի գրանից վաճառահանվում է և զրամական եկամուտի գլխաւոր աղբիւրն է կազմում:

Եյստեղի կով երը միջին և փոքր հասակի են, ըստ մեծի մասին աև գոյնով և աւելի սակաւ կարմիր գոյնով: Կովը միջին հաշով ունի 8—10 լիտր միս: Իւրաքանչիւր միջին տուն պահում է 5—10 կով, աւելի չքաւորները 2—3, իսկ հարուստները 15—20 և աւելի կով: Մի կով ամառվայ ընթացքում տալիս է մինչև 2 լիտր իւղ:

Եղը ծառայում է երկրագործական աշխատանքների և բեռներ կրելու համար: Միջին տունը պահում է 6—10, չքաւորը 2—4, հարուստը 30—40 եղ և աւելի,

Թէ կովը և թէ եղը մօտ վեց ամիս կերակրվում են տանը փակված: Նրանք ստանում են առաւտեան էրթ (յարդ, դարման), ճաշին՝ խոտ և երեկոյեան՝ կազ: Կովերին կազ քիչ են տալիս, իսկ եղներին մինչև 1—2 լիտր իւրաքանչիւրին:

Ոչխարը ամենասիրելի կենդանին է լեռնական սասունցու համար: Ոչխար ասելով՝ նայածախ հասկանում է ոչխար և այծ միասին, իսկ զանազանելու համար նա անուանում է առաջինին մաքի, իսկ երկրորդին այծ, կամ առաջինին սպիտակ ոչխար, իսկ երկրորդին սև ոչխար: Մենք գործ կածենք այնպէս, ինչպէս սովորաբար ընդունված է, ոչխար և այծ բառերով:

Ոչխարը և այծը աւելի բազմատեսակ արդիւնք են տալիս և աւելի լաւ են վաճառվում, քան միւս անասունները: Սասունի լեռներում

ծախու ոչխարներից կազմվում են մեծ հօտեր, որոնց յետոյ տանում են վաճառելու Դիարբեքիր, Հալէր և Շամ:

Ոչխար և այծ պահում է ամեն մարդ: Միջին տունը ունի մերձաւորապէս 200 գլուխ, ամենաչքաւորը աշխատում է մի 50 գլուխ ունենալը, իսկ հարուստները կարողանում են պահել ամբողջ հօտեր, բաղկացած 500—700 և մինչև անգամ 1000 գլուխ ոչխարից և այծից:

Սասունի շուրջ գտնվող սարերում ըիւրդերը բերում են արածացնելու իրանց հօտերը, իսկ ձմեռը նրանք չւում են և գնում հեռաւոր տափարակները, ներքին դաշտերը, որտեղ ձմեռը խիստ չէ և կարելի է ոչխար պահել առանց հընձած խոտի, կամ քիչ խոտով, բաւականական ձմերային արօտներով: Հայերը մնում են իրանց գիւղերում և կերակրում են խոտով, բայց գլխաւորապէս ծառերի (հօշի, լողիի և այլն) տերեններով, մերձաւորապէս մի մասը խոտ և երկու մասը տերեւ հաշուելով: Հարիւր ոչխարը ստանում են հարիւր բարդ տերեւ, ըստ որում ամեն մի բարդը բաղկացած է լինում երեսուն մեծ խուրձից, որոնցից իւրաքանչիւրը հազիւ կարող է մի մարդու շալակ կազմել: Ոչխարին համեմատաբար խոտ շատ են տալիս, իսկ այծին տերեւ:

Հայերը աւելի լաւ են խնամում ոչխարին, քան քիւրդերը: Եյդ պատճառով, երբ ոչխարը լուր է, վախ, ասում են «կարծես քիւրդի ոչխար է»:

Ոչխարը սպիտակամազ է, այծը սևամազ,

Ոչխարին խուզում են երկու անգամ, իսկ այծին մի անգամ։ Ոչխարի բուրդը կակուղ է, այծի մազը կօշտ։ Կակուղ մազ ունեցող այծեր այս տեղերքը չը կան և չեն էլ բերում Սլիվանից, Մուշի կողմերից, ուր կան տեղ տեղ։ Սասունցիները գնահատում են ոչխարի՝ բուրդը, իսկ այծի՝ կաթը։ Այծը ծախվում է լաւ գնով, ուստի նա սիրելի կենդանի է Սասունում։

Ոչխարը պարունակում է իր մէջ 4, երրեմն մինչև 5 լիտր միս։ Այստեղի ոչխարը ունի երկար դմակ, որ քաշում է մինչև մի լիտր և աւելի, օրինակ, 20 նուկի։ Մի լիտրը 12 նուկի է, մօտ 17 գրլանքայ (Փունտ)։

Ոչխարը տալիս է 1—2 նուկի բուրդ, 6—10 նուկի իւղ և բաւական քանակութեամբ պանիր։ Թէ ոչխարը և թէ այծը կթվում են օրեկան երկու անգամ։ Կէսօրին և երեկոյեան։ Այծը շատ կաթնատու է։ համարեա երկապատիկ աւելի կաթ է տալիս, քան ոչխարը։

Ոչխարի ծինը միաժամանակ չէ կատարվում։ Նա սկսվում է բարեկենդանից և մինչև անգամ աւելի վաղ և շարունակվում է մի քանի շաբաթ։ Այստեղ սովորութիւն չը կայ աշնանը դէչերին բաժանել ոչխարից և յետոյ մի որոշ ժամանակ խառնել միասին։

Քանի դեռ կանաչ խոտը լեռնային արօտներում այնքան չէ զօրացել, որ կարելի լինի հօտերը այնտեղ ուղարկել կերպակրվելու, ոչխարնեին չեն կրթում, այլ բոլոր կաթը թողնում են գառների համար։ Կթելը սկսվում է զօլան (մայիս) ամուից։

Կաթը եփում են և մածուն շինում։ Մածունի երեսը, իւղային մասը, շատ անգամ ժողովում են առանձին, աղում, լցնում կարասներ և այզպէս պահում մինչև խոր ձմեռը, երբ նրան ուտում են։ Կարասների բերանը փակում են և նրանց գլորելով բերանը վայր՝ պահում չոր տեղում՝ թաղած հողի մէջ։ Նոյն ձեռվ պահում են յաճախ և անքաշ մածունը, քամած և աղած։ Թանից պատրաստում են կամ ժամ ժամիկ, որ այստեղ անուանվում է թանհատ և պահվում է աղած, կամ էփած թան, որ կամ ուտփում է իսկոյն, կամ նոյնպէս աղփում է ու կարասների մէջ պահվում և գործ է ածփում ձմեռը ապուր շինելու համար։ Այդ եփած թանը թանձր հեղուկ է մաթի նման։ Զի և կամ թել պանիր Սասունում չէ պատրաստվում։ Քիւրգերի մէջ շատերը կաթի երեսը չեն առնում և պատրաստում են մեծ գլուխ պանիրներ՝ 1—2 լիտր ծանրութեամբ։ Երբ լեռներից իջնում են քիւրգերը, կտրտում են այդ պանիրը և կտորներով պահում աղաջրի մէջ առանձին կարասներում։

Սասունցիները պանիր չեն ծախում երբէք։ Իսկ իւղը կարողանում են արտահանել մի յայտնի քանակութեամբ։ Բուրդը մեր մասսամբ գործ է դրվում ընտանեկան պիտոյքների համար։ Բացի հագուստից, որի վրա գործ են ածում բուրդը, սասունցի կանայք պատրաստում են կարսեաներ, փալամներ, թաղիքներ, չուալներ և երրեմն գորգեր։ Այս վերջինները ըստ մեծի մասին տարածված են քիւրգերի մէջ։

Ուրիշ կենդանիներ Սասունում քիչ են գործ

ածվում: Գոմէշ ամենակին չը կայ լեռնային գիւղերում: Երբեմն Մուշի կողմերից բերվում են փորձի համար գոմէշներ և պահվում են հարուստ տներում: Խոզ ամենակին չը կայ Սասունում, թէև նա կարող էր բաւական յարմարութիւն գտնել իր համար Սասունի անտառներում, ուր կազին կայ մեծ քանակութեամբ:

Զի և ջորի կան միայն մի քանի հարուստ տներում: Զին աւելի հազուազիւտ է, քան ջորին, որ աւելի է յարմարվում Սասունի քարոտ տեղերին:

Համարեա իւրաքանչիւր տուն պահում է մի կամ երկու էշ, որ գործ են ածում բեռն կրելու, ջազացը ցորեն և ուրիշ հացահատիկներ տանելու, ալիւր և աղ կրելու: Հարուստ տներում պատահում են մինչե երեք և աւելի էշ պահողներ:

Շերամապահութիւնը տարածված է Ղուլփի և Ղիանքի շատ գիւղերում, օրինակ Իշխանուրում, Արտգունքում, Փառգայում: Մարդ կայ, որ մինչև 100 լիտր շերամ է գուրս բերում տարեկան: Շերամի սերմը իրանց երկրութիւն են հանում, ուրիշ տեղերից չեն ստանում: Մի քանի տարի առաջ մի պօլսեցի, Միհրան էֆէնդի, եկել էր Սասունի կողմերը և վաճառելու համար սերմեր էր պատրաստում, ջոկելով ընտիրները տկարներից, բայց նրա վրա ծուռ նայեց թիւրք կառավարութիւնը և նրան կալանաւորեց ու յետուղարկեց:

Մեղուարուծութիւնը յայտնի է Սա-

սունի բոլոր մասերում, մանաւանդ Դաւորիկի գիւղերում: Փեթակների թիւը ամբողջ երկրում հաշվում են մի քանի տասնեակ հազարներ: Գելիեզուզանի մէջ յայտնի հարուստ Պետօյի տանը շատ փեթակներ են եղել միշտ: Առաջին կոտորածի ժամանակ, երբ զելիեզուզանցիները, երկար մաքառումից յետից՝ թհուանօթների գնդակներից փախան լեռները, ազան թիւրք զինւորները՝ երբ մտան Գելիեզուզան զիւլը, շտապեցին Պետօյի տունը և ընկան մեղրի վրա, բայց այնքան շատ կերան միանգամից, որ մի քանիսը սաստիկ հիւտնդացան և ասում են, որ նոյն խոկ մեռան: Այն ժամանակ կասկած ընկաւ թիւրքերի մէջ, որ մեղրը իրը թէ թունաւորված է եղել: Այդ պատճառով կրակ առուին մեղրի ամբողջ պահեստը: Մեղրը հալվում էր և հոսում ձորակողով դէպի ջուրը:

V.

Ընդհանուր ակնարկ Սասունի վրա: — Սասունը հին ժամանակ-ներում: —Վարչական եւ տնտեսական, արտաքին եւ ներքին փոփոխութիւններ: — Սասունցիների ծանր եւ վրդոված դրութիւնը աղէտից առաջ: —Վերջաբան:

Մենք ներկայացրինք ընթերցողին այն պայ-
մանները և հանգամանքները, որոնց մէջ ապրում
է Սասունի ժողովուրդը: Մենք տեսանք, որ մի
լեռնոտ, խորտութորա երկիր, անթիւ ժարուերով-
ձորերով և կիրճերով, որի մէջ չը կան ընդարձակ
դաշտեր երկրագործութեան համար, կարողացել
է սքանչելի կերպով շնչանալ և ապրուստ տալ
հազարաւոր ընտանիքների: Եւ դա չնորհիւ այն
բանի, որ այդ լեռնների և ժայռերի կրծքին կպած-
կապված է մի աշխատասէր, խնայող ժողովուրդ,
որ մի անգամ ընտրել է իր համար այդ երկիրը,
այնտեղ բուն է զրել և այլ ևս նրանից չէ բա-
ժանվել ամբողջ դարեր, շարունակելով նրան շե-
նացնել և ընդարձակել:

Սասունը իր մէջ պարունակում է բնութեան-
հարստութիւններ, որոնց ձեռք բերելը, մարդ-
կային ապրուստին ծառայեցնելը՝ ըստ մեծի մո-
սին կատարվում է միայն աշխատանքով և
այն էլ՝ մեծ, աննկարագրելի ծանր աշխատանքով:

Սասունը առանց իր աշխատաւոր ձեռքերի ոչինչ
է: Աշխատանքն է, որ այդ բոլորը ստեղծել է:
Եւ դա մի այնպիսի աշխատանք չէ, որ մի ան-
գամ գործադրվեց ու վերջացաւ. դա մի տաճար,
մի կամուրջ մի բուրգ շինել չէ, որ մի անգամ
կատարվեց և երկար տարիների համար ծառայեց:
Դա մշտական, տոկուն գործունէութիւն է, ան-
քուն հսկողութիւն, անդադար խնամք, որոնց
պակասութեան, որոնց բացակայութեան միջո-
ցին — կորչում է այդ երկրի բազմազան արդիւ-
նաբերութիւնը:

Դեռ շատ հին ժամանակներում, զեռ հազար
տարի սրանից առաջ սասունցիները մշտակում էին
այդ երկիրը և յարմարեցրել էին իրանց կենցա-
զավարութիւնը երկրի պայմաններին և առանձ-
նայատկութիւններին: Պատմագիր Թովմա Արծ-
ծրունին, որը կարողացել է մօտից ծանօթանալ
սասունցիներին և նոյն իսկ ականատես լինել
շատ եղելութիւնների, հետեւեալ կերպով է նկա-
րագրում լեռնային այդ երկիրը և նրա ժողովուրդը:

«Այստեղ քիչ խօսքով բացայայտեմ լեռան
բնակիչների որպիսութիւնը, թէ որտեղից և ինչ
տեսակ մարդիկ են և ինչպիսի աշխատութեամբ
և սաստիկ տառապանքներով են նրանք հայթայ-
թում իրանց ապրուստի կարեռը պէտքերը: Նրանց
բնակութիւնը հաստատված է ձորերի խորքերում,
լեռների փապարներում, անտառների մէջ և սա-
րերի գագաթներին: Նրանք բնակլում են ազգ-
ազգ առանձին և այնքան հեռու են միմեանցից,
որ եթէ զօրաւոր մարդու մէկը բարձրաբերձ տե-

գերից ուժգին ձայնով գոռայ, հաղիւ թէ որ և է տեղում կարողանայ լսելի լինել, այն էլ իբրև մի արձագանք ժայռերի միջից: Նրանց կէսը շեղվել է հայրենի լեզուից՝ հեռու ապրելու պատճառով և միմեանց հետ հանդիպած ժամանակ՝ խորթանում են մէկը միւսից և խօսում են իրար հետ աղքատ, կարկատուն խօսքերով: Եւ պատճառում է, որ այնքան սաստիկ անծանօթ ու օտար են լինում միմեանց, որ նոյն իսկ թարգմանների կարօտութիւն են զգում: Իրանց կերակուրը պատրաստում են նրանք զանազան սերմերից, առաւելապէս կորեկ կոչված սերմից, որին սով ժամանակներում ումանք հացի անուն են տալիս: Սերմը ցանում են անտառների մէջերքում, խընամքով ջրելով և երկմատնեայ փայտատներով փորելով հողը:

«Մերկութիւնը ծածկելու համար նրանք գործ են ածում բրգեայ զգեստ, իսկ ոտներին հազնելու համար այծի մորթից շինում են կօշիկների նման մի բան:

«Ամառ ձմեռ նրանք բաւականանում են միատեսակ կերակուվ և միատեսակ հագուստով: Նրանք մշտական կրում են իրանց վրա զէնք, որ բաղկացած է նիզակից և որը նրանք միշտ պատրաստ պահում են անտառների, լեռների գաղաններից և յարձակվող թշնամիներից պաշտպանվելու համար:

«Այն դէպքերում, երբ թշնամին յարձակվում է նրանց երկրի վրա, լեռնականները միաբան գալիս են իրանց իշխանների օգնութեան, որով

հետեւ տիրասէր են:

«Ամպերից եկած ձիւների փուխը մակերեւոյթի վրա ման գալու հնարաւորութիւն ունենալու համար՝ նրանք ոտներից կապում են չուանշներով առանձին տեսակ փայտեայ քօշեր և դիւրութեամբ ընթանում են ձիւնի վրայով, ինչպէս ցամաք հողի վրայով:

«Նրանք զազանաբարոյ են, արինաբբու, նրանք ոչինչ են համարում հարազատ եղբայրների կամ իրանց անձի սպանելը: Նրանք կոչվում են մեկն ազէն սուրհանդակներ և ապրում են Աղձնիբի ու Տարօնի մէջ եղած սարերում:

«Իրանց խառն և անհետազօտելի լեզուի և բարքի պատճառով նրանք Խութ են կոչվում, որսեղից և սարի անունը Խոյթ է: Նրանք զիտեն սաղմոսներ հայ վարդապետների հին թարգմանութիւններից, որ միշտ գործ են ածում անգիր:

«Նրանք այն մարդիկն են, որոնք Ասորեստանի և Նինուէի Սենեքերիմ թագաւորի որդի Սանասարի և Աղրամելից յետոյ չուեցին եկան և որոնք իրանց անուանում են տէրերի անունով սանասանեաներ: Նրանք հիւրասէր են, օտարներին ընդունող, պատիւ տուող և պահող»:

Թովմա Ս. թիւնին, որ տալիս է այս տեղեկութիւնները, պատմումէ, որ Հայկական Յ կամ Փրկչական 851 թուականին, ուրեմն 1053 տարի սրանից առաջ, սասունցիները իրանց զարմանալի քաջութեամբ և համարձակ արշաւանքով կարողացան փախցնել թշնամիներին և աղատել երկիրը օտարի լուծից:

Այդ ժամանակ տաճիկների զօրավարը խառնէութեամբ և անգթութեամբ կարողացել էր իր ձեռքը զցել Մուշի դաշտը և սպասում էր, որ ձմեռը վերջանալուն պէս՝ արշաւի Սասունի լեռնականների վրա և նրանց ընկճի: Բայց սասունցիները սպասել չը տուին զօրավարին: Իրանը, ձմեռվայ միջում, արագ շարժվելով ձիւների վրայով, յանկարծակի յարձակվեցին թիւրքերի վրա, նրանց կոտորեցին, այս ու այն կողմ փախցրին և հաւ բանդարկեալներին ազատեցին: Տաճիկների զօրավարը վախաւ Բագարատի շինած հոյակապ մեծ եկեղեցին և թագնվեց զմբէթի մօտ: Սասունցի մեկնագէնները պատեցին եկեղեցին և նիզակով սպանեցին զօրավարին:

Եւ Սասունի հայը դարերի ընթացքում մնաց հաւատարիմ իրան: Մի կողմից նա քրտինքի մէջ կորած մի խղճուկ սամիկ մշակ էր, որ քերում էր իր լեռների շերտերը՝ օրական հաց հայթայթելու իր համեստ և նոյն իսկ ազքատիկ ապրուստի համար, նա բնութեան կատաղի կապանքների մէջ շղթայված մի փոքր ժողովուրդ էր, որ իր կեանքի համար շատ բան չէր պահանջում և յոյս էլ չէր կարող ունենալ բազմահարուստ կենցաղավարութեան համար. սակայն միւս կողմից նա հպարտ, յանդուգն, անվեհեր, անյողլողգ մի ոյժ էր, երբ խնդիրը գալիս էր նրա բարոյական յարաբերութիւններին դէպի դրսի աշխարհը, նրա ոգու անկախութեան, նրա իրաւունքների սահմանափակման կամ ջլատման խնդրին:

Նա, որ բնութեան փայփայանքը և շոյան-

քը ստացողներից չէ, նա, որին բնութիւնը երես չէ տուել երբէք, նա, որին սղմել ու ճնշել է և հայրենի սրածայր ժայռը և՛ նեղ ձորերի խորխորացը, նա չէ կամեցել մարդկային կապանքներ ևս դնել իր վրա և ծառայեցրել է իր հայրենիքի անմերձենալի բարձրաբերձ լեռները և դժուար մշակելի վայրերը իր դարաւար իրաւունքների պաշտպանութեան համար:

Սակայն նրան շրջապատող արտաքին պայմանները, որոնք առհասարակ նպաստաւոր չէին, վերջին ժամանակներս ենթարկվեցին որոշ ծրագիրներին ծառայող փոփոխութիւնների: Նրանք ձգում էին այնպիսի կապանքներ ստեղծել, այնպիսի պարիսապներ կանգնեցնել, որ լեռնական այդ ժողովուրդը վերջնականապէս ընկճի և մոռանայ մարդկային իրաւունքների անխախտութեան մասին իր ունեցած հին երազները:

Եյդ արտաքին փոփոխութիւնները կատարվում էին մեծ տարածութեան վրա կամաց և կամաց և զանազան ձեւներով: Եւ նրանց միայն մի ալիքը հասաւ Սասուն:

Եթէ Սասունի և առհասարակ թիւրքա - Հայաստանի ազգութիւնների և կրօնական համայնքների մէջ չը կար առաջ գիտակցական եղբայրութեան, քաղաքացիական միասնակեցութեան գաղափար, սակայն կար հար և ան ական, իսկ երբեմն նոյն իսկ մտեր մական զգաց մունք: Թիւրքերը հայերի հետ շատ տեղ կարողացել են երկար ժամանակներ ապրել հաշտ ու հանդարտ, մեղմացնելով և մոռացման տալով այն խորթութիւ-

նը, որ կար միմեանցից տարբեր տարբերի մէջ:
Բայց այդ գրութիւնը դուք չեկաւ գիպլօմատ
կառավարիչներին, որոնք իրանց օրհասական խե-
լացնորութեան մէջ սկսեցին յղանալ յանցաւոր
ծրագիրներ՝ արթնացնելու մահմեղական տարբերը,
ջնջել այն ազգութիւնները և համայնքները, որոնք
չեին կարող նպաստել համամահմեղական ձուլման
գաղափարին և նոյն իսկ կարող էին նրան խան-
գարող հանդիսանալ:

Եւ ահա սկսվում է մի երրեմն խուլ, երրեմն
բացարձակ՝ յանցաւոր գործունէութիւն այդ ուղ-
ղութեամբ: Աւզարկում են ջարողիչներ, որոնք
ամեն ճիգ են թափում ֆանատիկոս և ացնել
մահմեղական ժողովուրդը, որոնք հրաւիրում են
նոյն իսկ հեռաւոր տեղերի մահմեղականներին՝
չերքեցներին, չեշեններին, լեզգիներին գալ լցնել
Փոքր-Ասլիայի ազատ տեղերը՝ մահմեղական մի
մեծ աշխարհ ստեղծելու համար: Կազմվեց համի-
դիէի վայրենի գունդերի զինորութիւնը, որ մի
սարսափելի նեցուկ գարձաւ տեղական աստան-
դականների վայրենի գործողութիւնների և գաղա-
նային արարքների համար:

Թիւրք կառավարիչը, քիւրդ աղան, տեղա-
կան պաշտօնեան սկսեցին դառնալ ծայրայեղ
ք ծախն գիր դէպի քրիտոնեան, խստապ ա-
հան ջ դէպի հնազանդութեան արտաքին արտա-
յայտութիւնները և սարսափելի կասկածու-
թ դէպի ամեն մի գործ, ամեն մի երեսյթ, որ կը-
րում էր իր մէջ բարձր կուտուրականութեան
նշան: Ամեն տեղ գտնում էին անհնազանդութիւն,

յեղափոխական եթէ ոչ գործունէութիւն, գոնէ
մտածողութեան հետքեր: Ի զուր տեղը՝ բոնում
էին աչքի ընկնող մարդկանց, ինտելիգենտ ան-
ձերին, քահանաներին, ապարդիւն հարց ու փոր-
ձի էին ենթարկում և բանտարկում նրանց և դրա-
նով միայն վշտացնում ու յուսահատեցնում հայ
ժողովրդին և նրան թշնամացնում էին այն ազ-
գութիւնների հետ, որոնց հետ, լաւ թէ վատ,
բայց մի կերպ հաշտ ապրել է նա երկար ժա-
մանակներ:

Իրրե հետևանք այդ բոլոր գործողութիւն-
ների և քարոզների՝ առաջ եկաւ այն անրնական,
լարված գրութիւնը, որ տիրել էր Սասունի ել-
կըրին կոտորածից առաջ, և այն թշնամութիւնը,
որ ընկաւ զանազան ազգութիւնների և դաւա-
նութիւնների մէջ: Քիւրդը իր ընդհարումների
մէջ դարձաւ կատաղի և, նրա գործողութիւնների
մէջ սկսեցին արտայայտվել դաւադրական նախա-
պատրաստութիւններ և ոխակալ թշնամութիւն:

Սասունցին սովոր չէր աւելորդ բծախնդրու-
թիւնների: Նա չը գիտէր՝ թէ ինչ գաղտնի մե-
քենայութիւններ են յօրինվումնրա դէմ: Նա միայն
տեսնում էր, որ թէ քիւրդը, թէ թիւրք կառա-
վարիչը առաջվանից աւելի կոպիտ են և աւելի յան-
դուզն իր հետ:

Սասունցին առաջվայ պէս պաշտպանում էր
իրան, որքան նա կարող էր: Յարձակումներին
պատասխանում էր յարձակումներով, մահակին
մահակով, սրին սրով, հրացանին հրացանով:

Սասունցին վերջապէս սկսեց կամաց-կամաց

նկատել, որ նրա շուրջը փոփոխութիւնն եւ
են առաջ եկել: Նա տեսաւ, որ նրա հարևան
քեւրդերը գաղտնապահ են գարձել, որ նրանք
հրաւիրվում են առանձին ժողովների: Նա նկատեց,
որ քեւրդը թոյլ է տալիս իրան տմարդի վար-
մունքներ, նամարդութիւն, դիմելով իր հա-
սարակ ընդհարումների միջոցին տեղական իշխա-
նութեան օգնութեանը:

Եւ որ բոլորովին օտարութիւնութիւն էր տե-
ղական ժողովրդի համար, հարևան ազգութիւն-
ների մէջ տեղի ունեցող ընդհարումներին յան-
կարծ սկսեցին տեղական իշխանութիւնները տալ
մի ուրիշ, առանձին նշանակութիւն. սովորական
ընդհարումը վերածվեց քաղաքական խնդրի,
հովիւնների քաջ ինքնապաշտպանութիւնը նկատ-
վեց իրրե ըմբուտութեան արտայայտու-
թիւն, իրրե ապստամբական շարժման մի յայ-
տարար: Իսկ քեւրդերի անկարգութիւնները և
յափշակութիւնները սկսեցին աւելի ևս իրա-
խուսվել, իրրե օրինաւոր, տեղական իշխանու-
թեան շահերին նպաստաւոր գործողութիւններ:

Բայց Սասունի ժողովուրդը մտքով չէր անց-
կացնում մի րոպէ, որ կենտրօնական կառավա-
րութիւնը, թիւրքաց մայրաքաղաքի ատեանները
համակրում են տեղական կառավարիչների այդ
ընթացքին, այլ նա բացատրում էր այդ բոլորը
կառավարիչների կամայականութեամբ միայն:

Սակայն գործերի վիճակը շատ էր վատթա-
րանում և ժողովրդի դրութիւնը անտանելի էր
դառնում:

Սասունի ժողովուրդը, որ ամենամեծ նեղու-
թիւններով հայթայթում էր իր օրական ապ-
րուսաը, սկսեց ենթարկվել խիստ պահանջների:
Նրանից հարկ էին պահանջում և կառավարու-
թիւնը և քեւրդ աղաները, և այն՝ օրստօրէ աւելի
ու աւելի խստութեամբ: Սասունցին, որ ապրում
էր սահմանափակ հողում, որ իր տնային տնտե-
սութեան մէջ ծայրը ծայրին հասցնում էր իր
մեծ խնայողութեամբ և սակաւապետութեամբ,
որ ծանր հանգամանքներից ստիպված սկսել էր
այդ խուլ աշխարհը նոյն իսկ մի քանի պան-
դուխաններ գուրս բերել դէպի քաղաքներ, այդ
տնտեսապէս նեղված ժողովուրդը ենթարկվում է
նոր հարկերի, նոր տուրքերի: Այդ արդէն չա-
փազանց էր կամ, ինչպէս սասունցիները ասում
են, եր կիրը այլ ևս համբերել չէր կարող ար-
դար ողակը (*):

Սասունի ժողովուրդը սկսեց անհանդստա-
նալ: Գիւղի մեծերը, գիւղի հոգատարները ժո-
ղովում էին, խօսում էին, ասում, վիճում, բայց
ոչ մի ելք չէին կարողանում գտնել: Նրանք փոր-
ձում էին հասկացնել քեւրդերին և կառավարիչ-
ներին, որ իրանք նեղ վիճակի մէջ են, որ իրանց
երկիրը անկարող է այնքան ծանրութիւն տանել,
որքան նրա վրա գնում են, բայց նըանց պա-
տասխանում էին շատ կոպիտ և անողոք ոճով:

*). Յ. Մ. «Մշակե» № 8, 9 (1895) առանձին ուսումնա-
սիրութեան մէջ արդէն ներկայացրել է Սասունի տնտե-
սական պայմանների փոփոխութեան էութիւնը և պարզել
այն նեղ վիճակը, որի մէջ ապրում է Սասունի ժողովուրդը:

Սասունի գիւղերի ներկայացուցիչները միմեանց հետ տեսակցութիւններ կազմեցին խորհելու, թէ ինչ միջոցներ որոնեն, որ հեռացնեն իրանցից նորանոր բարդվող տուրքերը: Երկար վէճերից, բազմապատիկ խորհրդակցութիւններից յետոյ եկան այն եղբակացութեան, որ աւելուր պ պահանջներին նրանք չը պէտք է ենթարկվեն, որ պէտք է կանօնաւորապէս որոշվեն նըրանց պարաւաւորութիւնները և վերջդրվի երկուստեր հարկաւութեանը՝ և կառավարութեան, և քիւրդ աղաներին:

Սակայն նրանց այդ տեսակ առաջարութիւնները նկատվեցին իրբեք ըմբռոսաւութեան նըշան, իրբեք անհնազանդութեան արտայայտութիւն: Թիւրքերը սկսեցին իրանց պահանջները խստացնել և մի և նոյն ժամանակ փորձեցին մեղադրել ժողովրդին, որ նա չէ կամենում կատարել իր պարտաւորութիւնները, դրդված լինելով կողմանակի ազգեցութիւնից: Բայց այդպիսի մեղադրանքների համար ապացոյցներ չը կային:

Բանը այնպէս փոխվեց, սակայն, որ թիւրքերի ձեռքին շուտով ապացոյցների նման փաստեր էլ երևացին, Թիւրդ լրտեսները յայտնեցին տեղական թիւրք իշխանութեան, թէ Սասունի գիւղերի շրջանում նրանք տեսել են մի օտար մարդու, որ յաճախ շփվում է ժողովրդի հետ: Կառավարութիւնը լրտեսների միջոցով աշխատեց ճշտ տեղեկութիւններ ժողովել, թէ որտեղ է գտնվում այդ օտար մարդը, և 1893 թիւ մայիսի 1-ի օրը, յանկարծ ոստիկաններով պատեց այն

տեղը, ուր այդ ժամանակ լինում էր կասկածելի անձը և ձերբակալեց նրան: Այդ անձը Դամադեանն էր, որ բանտարկվեց, յետոյ տեղափոխվեց կ. Պոլիս և այնտեղ արձակվեց:

Դամադեանի կալանաւորելը համարելով միշտ զօրաւոր ապացոյց, տեղական թիւրք իշխանութիւնը սկսեց գործել ամենամեծ համարձակութեամբ: Նա պահանջեց սասունցիներից, որ նրանք յանձնեն իշխանութեանը երկրում գըտնվող բոլոր կասկածելի, մտքեր յուղող անձերին, և երբ դրա պատասխանը բացասական եղաւ, նա առաջարկեց, որ գիւղական մեծամեծները, նշանաւոր համփա մարդիկ, իշխանները գան նահանգապետի մօտ բացատրութիւնների համար: Սասունցինները, որ արդէն ունեցել էին ապացոյցներ թիւրք կառավարիչների խոստմնազանցութեան, կասկածով վերաբերվեցին իշխանութեան դիտաւորութիւններին և չը գնացին ներկայանալու:

Իսկ այդ միջոցներում կարծես դիտամբք քիւրգերը արդար թէ անսրդար կոիւներ էին գըցում հայ հովիւների հետ: Հայերը մի երկու անգամ թեթև դիմաղրեցին. բայց քիւրգերը չընկածվեցին և մինչեւ անգամ կարեռ համարեցին ընդհանուր աշիրաթական կոչ հանել, և աւար կանչել, միասին ժողովելով կուելու համար: Հայ հովիւներն էլ օգնականներ վերցրին իրանց հետ և քիւրգերին դիմաղրեցին այնպիսի ուժգնութեամբ, որ քիւրգերը թողին բազմաթիւ վիշրաւորված ու սպանվածներ և ամօթապարտ յետքաշվեցին: Թիւրգերի համար այդ ջարդը անսպա-

սելի էր, որովհետև իրանք փոքր ի շատէ պատրաստված էին: Նրանք այդ ժամանակ յայտարարեցին, որ հայերը վաղօրօք կազմակերպված են եղել, որ նրանք պատրաստութիւններ են տեսել քիւրդերին ջարդելու: Տեղական իշխանութիւնը, որ թելագրել էր քիւրդերին այդ տեսակ ենթագրութիւններ, այժմ լսելով քիւրդերից նոյնը, տեսնում էր իր ջանքերը պատկված՝ քիւրդի և հայի մէջ սկսված թշնամական զգացմունքը այնքան զարգացած, որ նա կարող էր արդէն աւելի վճռական քայլեր անելու և քիւրդերի հետ միասին՝ հայերին ջնջելու ծրագիրներ մշակելու:

1893-ի աշունը ծանը տպաւորութիւնների տակ սկսվեց: Հայերը յաղթել էին, և անարդար յարձակումները յետ էին մղել օրինակելի քաջութեամբ: Բայց նրանք լաւ գիտէին, որ քիւրդերը չէին մարսի այդ ջարդը և պէտք է մի կերպ վըրէժը լուծէին: Սաստնցիները հաշւում էին իրանց քաջերի ոյժը, իրանց լեռների անմատչելիութիւնը և յոյս ունէին, որ կարող են գարձեալ զիմազրեւ եթէ իրանց շուրջը թափառող քիւրդերը նորից յարձակում գործեն նրանց վրա, թէկուզ բոլորը միասին մի տեղ գումարված: Եւ դրանով մի կերպ հանգատացան:

Իսկ քիւրդերը թիւրք պաշտօնեաների հետ միասին շատ մեծ պատրաստութիւնների մէջ էին, այնպիսի պատրաստութիւնների, որոնք հայերի ենթագրութիւններից գուրս էին բոլորովին: Բիթլիսի այն ժամանակվայ նահանգապետ Թահսին փաշան կանչեց իր մօտ խորհրդակցութեան քիւր-

դերի գլխաւորներին, հոգեոր պետերին՝ Զիլանի շէլի Մահմադին և Դուղարի շէլիս Ամարին և զանազան պաշտօնեաներին: Խորհրդակցութիւնը այգտեղ վճռեց, որ քիւրդերը կազմակերպվեն ձմեռվայ ընթացքում, առաջիկայ գարնան համար հրաւիրեն լեռները բարձրանալու բարեկամ աշխաթները, որոնք բնակվում են աւելի հեռաւոր տեղերում: Իսկ որովհետև քիւրդերը յայտնեցին, որ նրանք բաւականաչափ հրացան և պատրօններ չունեն, որոշվեց, որ Թահսին - փաշան ձեռք կը բերի այդ բոլորը պետական պահեստներից:

Թահսին-փաշան աւելի արաւ, քան նա խոստացել էր: Նա կարողացաւ մինչև անգամ զինւորների մի վաշտ բերել տալ, որը, գարունը բացվելուն պէս, բարձրացաւ Սասունի լեռները և իր վրանները զարկեց Շենըկ գիւղի առաջ, Մըրկեմուզան կոչված խոտաւէտ մարգագետնում:

Զօրքերի գալը մի օտարութիւն, անսպասելի նորութիւն էր Սասունի ժողովրդի համար, որ շուարած տեսնում էր ինչ որ զաղանի մեծ պատրաստութիւններ իր շուրջը: Բայց աւելի ևս մեծ եղաւ նրա զարմանքը և զայրոյթը, երբ նա նըկատեց, որ Մըրկեմուզանի վաշտի և քիւրդերի մէջ ամենասերտ հաղորդակցութիւն կայ: Քիւրդերը գնում գալիս էին, ստանում զէնքեր և պատրօններ: Սասունի ժողովուրդը չէր հաւատում իր աչքերին: Ինչպէս, միթէ զօրքը ընդհանուրի պաշտպանութեան համար չէ, միթէ քիւրդը, հայը կամ մի այլ ազգութիւն կամ համայնք հաւասար չեն բարձր իշխանութեան և զինւորու-

թեան առաջ: Ի՞նչ, ուրեմն իշխանութիւնը միացել է ժողովրդի մի մասի հետ՝ միւսին ճնշելու, միւսին խեղելու համար: Սասունցիները այդ և դրանց նման հազար տեսակ հարցեր էին տալիս իրանց և խոր խոցված ու վիրաւորված սրտով գլուխները թափ տալիս: Վիճակը յուսահատական էր. բայց ի՞նչ կարող էին անել: Նրանք դիտէին, որ իրանց դէմ լարված մերենաները շատ լուրջ գործ պէտք է կատարեն, ուստի վճռել էին ոչ մի առիթ չը տալ ընդհարումի, իսկ եթէ ընդհարումը տեղի կունենայ, մնան հաւատարիմ Սասունի աւանդութիւններին և կուեն մինչև արինի վերջին կաթիլը:

Քիւրդերը երկար սպասեցին, տեսան, որ առիթ չը կայ, իսկ ամառը և լեռնական կիանքը շուտով պէտք է վերջանային. առիթը իրանք տուին, որով և ակսվեց այն կատաղի կոտորածը, որի հառաջանքները հասան աշխարհիս բոլոր ծայրերը:

Մեր նպատակը չէ խօսել այդ առաջին մեծ կոտորածի և նրա մանրամասնութիւնների մասին, ուր այնքան մեծ քաջութիւն ցոյց տուեց սասունցին, ուր հերոսացաւ այդ պատմական անվեհեր լեռնականը, և որին ընկճեց ոչ թէ քիւրդը, այլ թնդանօթը, պատերազմական կանօնաւոր զինուրութիւնը: Իսկ յետոյ, հետեանըը:

Մի ամբողջ երկիր, իր բարգաւաճ տնտեսութեամբ, իր օրինակելի արտերով, այգիներով տներով և գիւղերով, աւերլված, քարուքանդ արված, թալանված և այրված, ժողովուրդը կոտորված, ցրված, բանտերի մթութեան և գիճութեան

մէջ ապրելու գատապարտված, մի խօսքով՝ մի շէն ու մշակված աշխարհ բոլորովին ոչնչացրած և սարսափի ու գաղանութեան զոհերով լցված:

Եւ ինչո՞ւ, ի՞նչ պատճառով:

Միայն այն պատճառով, որ այդ երկրում ամբողջ դարերի ընթացքում տիրապետում են ազգեր, որոնք չեն գնահատում կուլտուրան, չեն գնահատում աշխարհաշէն, կանօնաւոր աշխատանքի վրա հիմնված գործունէութիւնը:

Եւ բնորոշ է, որ այդ բոլոր շարժումը, այդ բոլոր յուսահատական կուրը թիւրքը վերագրում է ոչ այն անտանելի վիճակին, որի մէջ ապրում էր Սասունի ժողովուրդը, ոչ իր զրդումներին, ոչ իր պատրաստութիւններին, այլ արհեստական դրսումն, արհեստական կազմակերպութեան: Եւ այդ ասում է այն իշխանութիւնը, որ ինքը վաղօրոք, տարիներ շարունակ հող է պատրաստել ժողովրդի համբերութիւնը փորձելու համար, որ նոյնիսկ ահեղ կոտորածի սկսվելուց երկու ամիս առաջ մի վաշտ զօրք էր բիրել և Մրկեմուզանումկանգնեցրել:

Ո՛չ, այդպիսի զոհարերութեան ընդունակ է լինում միայն այն ժողովուրդը, որ ամենաշօշափելի փաստերից և դէպքերից յետոյ յուս ատ վել է, որ չէ հաւատում թէ աղաչանք պաղատանքով կարելի է գործ կատարել և դիմում է մի միջոցի, որը պէտք է նրանից մեծ և անվերադառնալի զոհեր պահանջի, որ պէտք է նրանից խլի սիրելի որդիներին, եղայրներին, քոյրերին, ծնողներին: Դա մի յուսահատական ծանր վճիռ է, մի սարսափելի երդում, որ պէտք

Ե արիւնի գնով ի կատար ածի իր ուխտը: Եւ
այդ ուխտը կատարելու գնում է ոչ միայն հասա-
կաւոր տղամարդը, այլ և՛ կինը, և՛ ծերը և՛ պա-
տանին, աշխարհականը և հոգևորականը: Այստեղ
ամբողջ երկիրն է հառաջում, ամբողջ
երկիրն է բողոքում և կռւում: Այդտեղ
կեանքը, եղած վիճակն է ամեն ինչ որոշում, և
ոչ թէ արհեստական զրգումը: Այդտեղ կարող են
զործել, ի հարկէ, և ազիտատօրներ, բայց նրանք
չեն շարժման և դիմազրութեան ազրիւն ու հիմքը.
Նրանք միայն օգտվել են եղած տրամադրութիւ-
նից և միացել նրան:

Սասունը միայն մի մասն է ընդհանուր զրու-
թեան, նա միայն մի խիստ լուսաբանու-
թիւն է տիրող կարգերի համար: Սասունը մի
երես է այն տխուր պատմութեան, որ հազար
տեսակ փոփոխութիւններով կրկնվում է Փոքր-
Ասիայի գաւառներում: Սասունը ընդհանուր յու-
սատութեան ամենաուժգին արտայայ-
տութիւններից մէկն է:




Երկիրը պէտք է խաղաղվի: Նրան պէտք
վերադարձնել իր զաւակներին, որոնք միայն կա-
րող են նրան կեանք տալ: Բայց հաստատ գրա-
ւական է հարկաւոր ժողովրդի համար, որ նա
զիտենայ, թէ նա է իր աշխատանքի տէրը, թէ
նա կարող է այսունետե հանգիստ հանդարտ նուի-
րել իրան իր անտեսութեանը, իր որդիների կըր-
թութեանը, ապահովված լինելով արդար դատաս-
տանով և իրաւունքների ան խտութեամբ:

Նրան մարդագարի կեանք է հարկաւոր:

U u U A F Y

Մասշտաբ 500.000

Կազմեց Խ.Քալանթար





574

Ա Տ

7488
7489

0003732
0003733

2013

ՀՀ Ազգային գրադարան



NL0003733

ՀՀ Ազգային գրադարան



NL0003732

